

PETRI ÆRODII  
Judicis Quæstionum Andium-  
que Ducis quondam libellorum  
Magistri J. C.

D E  
PATRIO JURE

*Ad Filium Pseudo-Jesuitam  
Dissertatio.*

*Eme, lege, judica non pœnitebit.*




ULTRAJECTI,  
Apud Johannem Ribbium, Bibliop.  
M. DC. LXXI.





A D  
LECTOREM.

 *Uia jam per triennium quæro filium meum maximum frustra, id (est enim inter Jesuitas) quod privatim præstitissem, facio publicè. Ago ut cum reo absente ac fugitivo, hoc est, annotatione & programme. Itaque, si tibi videbitur (ò Lector) me non immeritò expostulare ac conqueri:*

AD LECTOREM.

*eveniatque fortuitò ut obvius  
sit furtivus ille & seductus  
adolescens : Fac ( quæso ) le-  
ctitet hunc libellum. Postea,  
non recusò, si quid sui juris,  
arbitriique est, quin mihi pa-  
reat, aut non pareat Patri.  
Andibus, Anno M. D. LXXXIX.  
Mense Octobri.*



PETRI ÆRODII

Quæstoris Andegavi.

D E

PATRIO JURE

*Ad Filium Pseudo  
Jesuitam.*



Quid est quod Nazianzenus ille, in oratione apologetica ad populum, plus dicit esse in potestate patris, quæ est à Deo, Opt. Max. quam in ea quæ ab hominibus sive lege, sive moribus inducta est? hoc unum, HONORA PATREM TUUM, ET MATREM TUAM, potentiუსne est in

A 3

libe-

liberos, quam fulmen illud abdicationis, quod Græcorum erat institutum? quam jus illud vitæ & necis: quod, licet abominandum, tamen & nostrum fuit, & multorum olim populorum? quam trinæ illæ emancipationes, totidemque venditiones, quæ fuere potissimum Romanorum? Si filius non obtemperasset: pater, his legibus, sibi ipse jus dicebat. Idem citabatur accusator, idem testis, idemque judex. Præterea, quæ supplicia habebat in potestate, ea erant hujusmodi, ut sola cogitatione acerbitalis filius deterreretur quicquā audere & velle quo violaretur pietas. Deo contra sufficit jussisse. Officioso præmium promittit: contumaci, nihil irrogat. Atqui lex potentior est, quæ punit, quam quæ jubet duntaxat: & prævalet auctoritas quæ sua est, quæve suo jure quis utitur fruitur: quam quæ ita demum justa ac legitima est, si impetrata & accepta. Jam vero quid operabatur summa illa patria potestas, huma-

humana (dico) non divina ? operabatur ut ea quæ privata est, publica aliquando major esset, ut qua in re officium Magistratus debile, ac quasi mancum videretur esse: ibi tanquam provocatione aliqua, auxilio subsidioque esset domestica disciplina: hoc est, plus possent in liberos parentes, quam lex, legiove, aut ipsa summa Dictatura. Cn. Martius Coriolanus pergebat infesto agmine adversus patriam. Quis illi è manibus succussit arma, quis fasces, quis imperium, nisi una Veturia? Qui legatis Senatoribus, Magistratibus, Sacerdotibusque non cesserat, matri cessit: & quem neque majestas Imperii, neque religio dimovisset, movit appellatio matris. Tribuni Consulari potestate, Cn. Servilius, L. Sergius, M. Papirius contendebant invicem, quis eorum bello adversus Lavicanos potissimum præficeretur. Singuli sese anteponebant: & curam urbis, ut ingratam atque ignobilem, aspernabantur.

bantur. Patres, cum hoc certamen mirabundi conspicerent, neque Dictator esset qui cogeret Tribunos: Q. Servilius: Quando nec ordinis hujus, nec Reipubl. (inquit) ulla verecundia est: patria Majestas altercationem istam dirimet, Filius meus extra portem Urbi prærit. Quid pater C. Flamini, Tribunus plebis? ferebat invito Senatu legem Agrariam: atque intercessioni collegarum non parebat, imo nec exercitu quidem absterrebat adversus se conscripto, si perseveraret in sententia. Pater ei pro rostris legem jam ferenti manum injicit. Quid filius? descendit: & cui nihili fuerat tota Reipubl. majestas, auctoritas, prærogativa: fractus est privato imperio: & ne minimo quidem murmure destitutæ concionis repræhensus est Tribunus, ut lib. V. Valerius scribit. Quomodo itaque fieri posset, quin, quod ad jus patrum plus attinet, plus virium esset in legibus humanis, quam in eo nudo ac simplici præcepto quod  
à Deo



à Deo olim per Moſem datum & acceptum eſt ? Si verum eſt quod Hali-  
carnaffæus ait, propterea apud Græ-  
cos hæc monſtra ordinaria fuiſſe,  
Contumaciam, Impietatem, Parrici-  
dium: Romæ, rariffima: quia, quam  
potestatem hi veteres Legiſſatores,  
Charondas, Pittacus, Solon parenti-  
bus tribuerunt, mollem ac debilem  
dediſſent: quam Romulus contra,  
liberam, plenam, atque ſine exceptio-  
ne, ſic ut toto Romano Imperio vix  
unus Malleolus fit inventus. quid de  
hoc mandato dici poteſt, quod nulla  
exhæredatio, nulla crux, nulla poena  
ſanciebat. Jubet duntaxat quod ſua-  
det pietas. Nemo his ita putet ſatis-  
factum, quod, ut aliis omnibus le-  
gibus; ita Moſaicâ, parricidium non  
ſolummodo graviter punitur, ve-  
rum etiam quicquid à filio pronun-  
ciatum ſit inverecunde. Neque e-  
nim hîc tractamus de auctoritate  
Magiſtratum, neque de ea omni-  
no vi, & poteſtate quæ cernitur in

foro, aut in judiciis. De ea agimus quæ potest exerceri domi; quæ inter penates; & quam patres, non patriæ, sed familiæ, suis auspiciis habent in liberos, hoc est, sine ulla provocatione alterius, & nullo judicis officio intercedente. Nam qui ope aliena punit, non punit, sed accusat. Atqui, præter id quod jam Gregorio objecimus, tantum abest, ut oraculo illo coelesti patres plus juris habeant in suos, quam his aut illis hominum legibus; ut ne vel minimum quidē dici possint accepisse. Nam unicum istud, HONORA PATREM: si filius non fecerit, quid tribuit patri? Allicit quidem præmio, hoc est, vitâ beatâ ac diuturnâ: sed, quasi in ea aliquid insit quod Natura abhorreat sponte; patri poenam non commisit. Erravit itaque Moses: & cum poneret leges à Deo latas, in hac patria negligentior fuit? Nefas est dicere. Nam & priusquam esset, hæc potestas erat, quam quærimus: argumento est, quod Deus non imperasset.

raſſet Abraamo, *filium uti immolaret* : niſi alioqui in eum jus vitæ ac necis habuiſſet. Juſſiſſet Deus? feciſſet pater? tolleraiſſent proximi, alienive, quod nullo caſu, nullo tempore, nullo jure licuiſſet patri? Sed & qui Moſem anteceſſerunt, non ita ſoliciti fuiſſent de matrimonio liberorum : id nempe ſui juris, arbitriique eſſet, non contrahentium ( hinc enim & diluvium ) neque liberi ipſi tam cupidi paternæ benedictionis : quid amplius? ſola denunciatio à patre facta Magiſtratui, vim non habuiſſet plenæ probationis adverſus filium contumacem : niſi jam illo tempore ſumma fuiſſet patria poteſtas, auctoritasque domeſtica. An Deus igitur poſteriore lege priorem illam antiquaſſet, ſolo verbo dimetiens cultum? Si ita eſſet : quid diceremus pro Nazianzeno? Eſſet procul dudio quid diceretur, niſi homini & Chriſtiano, & Epifcopo videretur obſiſtere ea ipſa Chriſtiana religio, quam quaſi ab eo tamen accepimus.

Nam paterna auctoritas , si quæ est hodie , sic ab ea descivit , quam sive Deus , sive Natura ipsa , sive jus Gentium , sive leges præscribere ab initio : & propterea descivit , quia nescio quo pacto pietatem à Religione sejungimus : ut inter Christianos nihil jam plane patrium sit , nisi appellatio sola atque denominatio patris. A re separata est pietas : in verbo hæret : Possit Christiana disciplina , atque ea Divina constitutio quâ laudat Gregorius ille , stabilisse domesticam , disciplinam si Christiani eam præcipue labefactent ? Veruntamē ante omnia satisfaciamus magno Theologo , postea videbimus an verum sit , nullam potestatem nobis superesse in liberos : aut si sit etiā tantilla , num adhuc sit hujusmodi , ut despici , violariq ; tamen non debeat. Certum est , quam atrocitatem Legislatores olim invenere , quo redderent patriam potestatem ampliorem : astute , atque subtiliter invenisse : videlicet , ut ea apposita , vi , aut sponte filii essent  
offi-

officiosiores: utque ab ea observantia nullo pacto distraherentur, quam, non Lex, non rogatio aliqua, sed natura à lacte hominibus infudisset. Sciebant ita esse libidinosam adolescentiam: ea arrogantia & lascivia: sic regi, domarique difficilem, ut existimaverint necesse esse, terrore reparari ac refici quod à Natura malignitate depravatur: ut, quemadmodum antiquitus laceratione ac Sanguine fidē debitorum conservassent: representatione suppliciorum, quæ versarentur in sola parentum potestate, in sinuarent liberis obedientiam evincerentque ne quicquam susciperent, agerent, cum hi prius non annuissent à quibus & vitam & eruditionem habuerunt. Cæterum, id non repugnare pietati. Hanc enim ita esse à Natura: ita à parentibus pro liberis consilium capi, ut tamen certissime crederent nunquam posse evenire quod permisissent: videlicet à patre filium venundari, abdicari, interfici. aut si accideret quandoque: sic

fic eo merito, ea consideratione fore, ut si ipsa Justitia jus dixisset, haud quicquam justius, meliusque dici, agive videretur. At Deus res aliter tractat. Quod jubet, aperte jubet: non oblique, non pedetentim. Nihil ei circuitu opus est, nulla ei præfatio necessaria qua persuadeat verum, bonumque esse quod postulat. Cur ita? quia tam bonus est sua sponte: tanta prærogativa in eo est justitiæ & æquitatis, ut qui eum audiat monentem, pareat, acquiescat in continenti. Plures Religio continet, quam metus. Exempli gratia: Filius petulantior erat: proptereaque sæpe familia ejectus? imo & tandem à parentibus abdicatus, quia in eum nihil humani proderat quicquam? Si transibat ad Christianismum: hoc solo (Septimius inquit) revertebatur ad bonam mentem: unica hac suadela restituebatur pietati & officio. Profecto si Naturæ, legibusve hominum Deus, interposuit sese: nihil inde detraxit tamen  
im-

Imperavit obedientiam: sed potestatem non ademit. Imo, longe post Christum, ea quæ necis aut vitæ fuit, valuit inter fideles. Et si quid veteres Christiani redarguerunt in Paganis, veluti infanticidia, aut gladiatorios ludos: adversus jus illud horrendum nihil dixerunt. Utcunque Deus Opt. Max. nude pronunciavit, HONORA PATREM ET MATREM TUAM: nihilominus duabus præcipue de causis, leges hominum antevertit. Una: quia constans ac perpetuum est quod jubet. Nostra quotidie immutantur. Si quid hodie placet, cras displicet. Videre est in eo ipso jure quod à Romulo introductum est. Nam initio licebat sine exceptione filium interficere. Postea, nisi consilio adhibito. Rursus: non inauditum. denique non judicio domestico, sed per Magistratum. Imo vero tandem jus illud extremum evanuit prorsus. Altera, quia si edictum Consulari Prætorio majus est: Honorarium, Ædi-

Ædilitio : necesse est eo tanto Divi-  
nū humano anteferri. Quamobrem?  
*quia prudentia humanatam falli, quam  
contemni facilis est*; inquit Tertullia-  
nus ille. In Deo nihil tale est. Ergo  
Gregorius, qui ista sentiebat, & qui  
præcepto domini nullam limitatio-  
nem afferebat: cum mundum vertis-  
set, & contra votum, imperiumque  
patris, monasterio deditus, refugeret  
paternum Episcopatum: pertinuit  
tandem. Possim patri meo opt. sine  
fraude (inquit) impius, inobediensque  
esse? accusari contumaciæ, fierique  
reus Naturæ violatæ, pollutæve? Igi-  
tur missa solitudine redit domum. Se-  
dem Ecclesiamque accipit. [ *Et hoc  
facio (inquit) jussu Dei magis, quam  
hominum metu. Itaque (ô pater) dicto  
jam audienti præbe benedictionem.* ] Po-  
test Gregorius ille sic accipi. Nam &  
Chrysostomus, lib. II. adversus vitup.  
vitæ monasti. sic scribit: *Filius non  
tantum naturali lege te colit, obser-  
vat, honorat: verum multo magis;*



*ut Dei jussis obtemperet, propter quem cuncta simul penitus despexit ac reliquit. Sed si nihilominus verum est, jam ne extare quidem ulla vestigia patriæ illius potestatis quam quærimus: sique auctoritas domestica hodie vix in umbra & imagine consistit: qui ille omnino defendi possit? Jam diu abrogata est contrario usu (ut diximus) summa vitæ ac necis potestas illa. Nec ultra est pignori, aut venditioni locus. exhæredationi, ne vix quidem. Quicquid acquirit filius, sibi hodie acquirit: non patri. In jus vocat, accusat sine veniâ Denique (ut ajunt) ea Religio nunc est, ea traditio Ecclesiæ: filium, quamlibet vitam instituat: nubat, aut monasticam voveat: posse ista omnia spreto, invitoque patre. Qua igitur in re, aut quo in negotio consisteret inter Christianos (ô Nazianzene) Dei & Naturæ elogium illud, HONORA PATREM? In quo collocabas auctoritatem, majestatemve domesticam, cum*  
tan-

tantopere reformidabas in eam ne impingeres? Si illis casibus quos attigimus, possunt liberi parentibus impune non parère: qui hi sunt quibus ex vetere jure nunc nō liceat quoque? quæ capita domesticæ disciplinæ Christiana etiamnum approbat fides? An fieri potest, ut Ethnici punierint usque ad inferos, filium inverecundum, adeo iis placebat obedientia in parentes (ex illo patre hoc natum est, qui ut narrat *Pausanias*, lib. 10. infra naviculam Charontis, filium in finiquum olim ibi strangulavit.) & Christiani contra casus invenerint, in quibus hic licita esset impietas in parentes? An (ut ait *Theophilus*, lib. 3. *ad Eutol.*) ideo præcipue displicuit lex Platonis de communione uxorum, quia periculum erat, ne filius eum, qui non erat pater, ut patrem honoraret: qui esset revera, ei ignorantia ductus, nullam reverentiam deferret, quæ tamen adeo collocatur, adeo debetur inter præcepta Juris Gentium, &

& quidem secundo loco : ita enim Pomponius , ut parentibus , & patriæ pareamus : & nostra Religione in ea re potissimum peccaremus ? Ergo dicemus ante omnia & quasi per aversionem , stultum , impiumque esse , ponere & affirmare , si debilitata est patria potestas , si diminuta , & quasi redacta in ordinem : nullam propterea amplius esse : Aut , ut fuerit abrogatum imperium domesticum ( nam & Romani sic appellabant ) propterea sequi , remotam esse ab ea potestate cum pietatem , tum reverentiam naturalem. Deinde , descendendo ad particularia , inspiciemus si singula sunt hujusmodi , ut in iis sit necesse , aut non liberos adhuc parentibus obedire. Facile id obtinebimus , si scrutabimur quid esset apud veteres quod ita à liberis exigebant , cum tantum jus , tantam potestatem parentibus largiebantur. Certum est , hoc propterea non fecisse , ut parentes in causa liberorum essent pro Magistratu : & quem

quemadmodum in foro jus civibus dicitur à Prætore, ita à patre fieret domi, quocunque modo, & adversus quemcunque liberi deliquissent: denique, non ut alia esset Jurisdictio publica, alia domestica. Criminibus enim publicis, & si quid committerent extra focum, præpositus erat Magistratus. Neque ita bene infertur, Reus est filius familias: ergo nullus ei Judex debet esse præter patrem. Certe quidem Romæ, & apud quasdam alias gentes (de quibus scripsimus, lib. 6. Rerum Judicatarum cap. 7.) extitere, qui, vi patriæ potestatis, de eis quoque cognovere quæ liberi extra familiam deliquissent: cujusmodi sunt Cassius, Manlius, Torquatus, C. Flaminus, & alii plerique. Non igitur ea fuit occasio propter quam veteres tantam prærogativam parentibus tribuissent. Ea est de qua Halicarnassæus in Romulo, nempe, ut cum liberi animadverterent quæ domi in se potestas esset, hanc vel publica esse ampliore:

ampliores : primum enim parentibus , postea Patriæ jubentur obedire : sed & Principem ipsum vix quicquam posse incognita causa : parentes ex adverso, omnia quasi pro libidine ( ita enim Aristoteles in politicis ) hi sese obsequio voverent , nihilque omnino nisi ex formula agerent , hoc est , *si non edictum , præscriptumque esset à parentibus*. Sibi neque velle, neque nolle aliud esset , eo excepto quod ab his , tanquam à fronte & capite accepissent , Denique , ut , quemadmodum freno , calcare & bacillo admoto paret equi jumentum : Sic metu tantæ disciplinæ, filius familias, quasi altero Deo , auctoriq; suo , faceret , pareret patri. Sane si nihil aliud majores nostri voluissent , quam frenum adolescentiæ apponere : si nihil nisi ea vitia impedire , ad quæ natura est proclivior : finissent eam potestatem ætate , dignitate , aut conditione aliqua. Atqui filii familias, quoscunque annos attigissent, quem-

vis

vis iniissent Magistratum, Sacerdotiumve, semper erant alieni juris. Quid igitur? quicquid pater de liberis statuisset, cuilibet vitæ destinasset, etiam rusticæ, ut L. Manlius, intuitu tantæ potestatis, contra quam nulla esset intercessio, nullum auxilium: omnis obedientia erat necessaria. Ea re eveniebat, ut filii negotia omnia sic à patre proficiscerentur, ut ab origine; exemplar: à scaturigine, rivulus. Sane, si, filio ab ea aberranti via: si contumaci, si inverecundo alii duriores poenas invenerunt, alii leviores: si alibi patri iudicium dedere, alibi querelam, testimoniumve duntaxat: imo vero, si longo intervallo poenæ omnes domesticæ abiere in desuetudinem (de animadversione puerili, nihil ad rem) non propterea sequitur, desiisse rectum esse sua sponte quod de pietate est constitutum: non sequitur, cessare legem, edictumque omnium Gentium, *Liberi quacunq; in re parentibus dicto audientes sunt.* Jura, etsi impunita,

nita, jura sunt, ut, de adulterio, licet de eo vix agatur, attamen semper naturâ suâ turpe est. Si negligentia, aut dissimulatione non punitur: lex qua prohibetur, non minus pudica & honesta est. Sic obedientia liberorum, non minus justa ac legitima, si inulta est plerumque. Ex Mose hoc præcipue cognoscitur. Ut pater filium suâ manu occideret, noluit quidem. Voluit impetrari, ac fieri per Magistratum. Sed hoc sine alia inquisitione, quam quod pater ita postulasset. Unde profecto colligitur, patrem apud Judæos quoque jus vitæ & necis habuisse. Nam quamvis retardatum ea formula: non tam difficile est petere parricidium quam facere, Veruntamen, quo crimine Judæus ille Legislator volebat filium deferri posse à patre, & eâ delatione sola lapidari in continenti? an quia parricida, aut sacrilegus? quia perduellis, quia latro, aut adulter? an denique, quia in legem aliquam publicorum judiciorum commisisset?

Flu-

Audiamus eum loquentem : Si genuerit homo filium contumacem ac protervum, qui non audierit patris, matrisque imperium & coërcitus obedire contemserit : apprehendent eum, & ducent ad seniores civitatis illius, & ad portam judicii : dicentque ad eos, Filius noster iste protervus ac contumax est : monita nostra audire contemnit. Vacat commensationibus, luxuriæ, ac conviviiis. Lapidibus eum obruet populus : & morietur. Quæ vitia hic narrat nisi commissa in parentes, nisi familiaria ac domestica ? nisi patrata in foco, non in foro ? Profecto, quemadmodum voluit disciplina militaris, ut contumacia in milite esset capitalis, quia nulla alia re res tam periclitantur : sic domestica, in qua pater est pro Dictatore, necessario postulavit, ut omnes qui essent in familia, servi, liberi, uxor, animalia omnia patrem unum suspicerent, colerent : neque eorum esset ulla alia voluntas, ulla inclinatio, quam quæ profecta à patre illo



illo atque Imperatore familias. Est apud Ælianum de Rhacone Mardo, cum Cartomen filium, revinctis manibus, adduxisset ad Artaxerxem, ut eum occîdi juberet, quia audax, quia nequam, quia perditus: & hoc identidem urgeret: Potisne es (Rex Persarum inquit) ferre, & aspicere, filio eripi vitam? Respondit: Est mihi lactuca in horto, lasciviens foliis. Sint licet pars corporis: defringo amara, & superflua. An deperit propterea, & quasi luget furculo exciso? imo tanto efflorescit, & eo damno fit dulcior. De me (ô Rex) sic existimes. Nam etsi mortem ejus aspexero qui familiæ officit meæ, & qui fraterculos corrumpit petulantia & protervia: melius mecum esse arbitror, genereque non diminui, sed augescere. Hæc Mosi, hæc Halicarnassæo conveniunt. Sed quo ista magis confirmantur: quî fit ut hæc quaestio, *An filius aliquo casu jure non obediat patri*, egrediens domo in scholam venerit: hinc

B

tandem

tandem in iudicium : nisi quia erat antea inaudita : & ratum , firmumque erat nullo olim casu contigisse? Danaus , cum filias quinquaginta nepotibus ex Egisto vi dedisset in matrimonium : mandaverat virginibus , ut in diem ipsum nuptiarum , gladio , quem ad hoc obtulisset , unaquæque sponsum occideret ( est apud Chalcondylam , idem imperium medici cujusdam Florentini , qui filia imperavit , ut eadem nocte veneno occideret Eantillaum ) fecere ex præcepto , unâ exceptâ Hypermnestrâ , quæ Lincæum servavit. Quid inde? tantum abest ut sicariæ istæ & parricidæ causam eo nomine dicerent : & paruisse , crimen esset : ut contra Hypermnestra , *Quod non obtemperasset* , accersita sit capitis , vixque eo evaserit iudicio. Adeo in obedientiâ quæ parentibus debetur nulla admittebatur exceptio. negare , aut tergiversari non licebat. Absoluta est quidem : sed paribus sententiis : sed ea hæsitazione , eo periculo

culo (patet ex ejus epistola apud Ovidium) ut Veneri & Dianæ, quasi è naufragio, & templum & tabellam construxerit, fixerit. Quomodo itaque diminueretur obedientia illa domestica, cum, liberi etsi parendo deliquissent, paruisse, laus sit: non paruisse, crimen? Velle non creditur, qui obsequitur imperio patris, vel domini, inquit Ulpianus, & venia dignus est qui obtemperavit, ut ille ipse ait l. 1. de iis quæ not. infam. Certe idem dicebatur à Tiberio, Filium non posse detrectare jussa patris. Utut sit, obtinuit certe (inquit Gellius) siue honestum sit quod jubetur, siue medium: obtemperari debere omnino. Si turpe: ita attamen non parendum, ut fiat leniter ac verecunde: non cum reprehensione aut detestatione aliqua. Differatur, declineturque magis, quam respuatur quod jubetur. Sit in contumacia pudor: filius, non parendo, pareat patri: veluti Agesilaus qui patri imperanti, ut contra leges sen-

tentiani diceret : Memini (inquit) te olim mihi pro legibus imperasse. Faciam igitur non quod hodie jubes, sed quod jussisti aliquando. Veluti Aero-tatus : à quo cum parentes inique aliquit exigèrent : honeste sic negavit : Scio vos velle ut quod justum est faciam : ita enim olim me instituistis. Faciam igitur quod vultis : & quod jubetis , non faciam. Qui aperte contradiceret , atque obsisteret arroganter adderet petulantix impietatem : impietati, scelus. Etiam in bona causa, filii apud parentes debet humilis esse oratio , inquit Salvianus Presbyter. Utrum enim verum esset quod dictum est à majoribus, *Vultu quoque ladi pietatem*, si jure aliquo filii inobedientia defenderetur? Legatus esset inviolabilis apud hostes? in eum verbo quoque abstineretur? & paterfamilias haberet domi, atque inter lares, justum correctorem, contradictorem, adversarium? Sed cur tantopere huic positioni immoramur, videlicet, propterea hoc  
jus

jus domesticum introduci, ut si quid contra à liberis obtenderetur, omnis interclusa esset refragandi ac disputandi via? Infusum, insitum est à natura. Jus naturale postulat, ut liberi subditi sint parentibus. Sanctum & laudabile censetur, non solum apud Deum, sed & apud homines, videlicet ut in simplicitate, & absque omni malitia subjiciamur parentibus, inquit Theophilus ad Eutolycum. Et quod Deus ipse nihil addidit ultra præceptum: fecit eam ob causam quia sufficebat perstrinxisse quod alioqui naturale esset, ac commune inter omnes, ideoque immutabile, ideoque constans ac perpetuum. Ut ergo doceamus patriam potestatem esse è natura: mulierne potest magis naturaliter subjici viro, quam filius patri? Atqui mulier, sola sexus infirmitate homini subjicitur: Filius, eo amplius, ætate, atque beneficentiâ. Ut vero illa duo non sint, ne, quam pariunt obligationem, eam quis dixerit expirare adepta ætate, &

viribus : ( quanquam , quæ prærogativa inde acquiritur , perpetuo durat , inquit Aristoteles ) quæso ultimum quale est ? Naturaliter ad remunerandum obligati sumus . Nam quis ab Ulpiano dissentiat ? & ( ut pulchre à Philone ) delinquit in humanitatem qui ingratus est : qui acceptum beneficium , quantum in se est , non rependit . Imo , homini beneficium non referre , simile est homicidio , inquit Ambrosius , de obitu fratris . Atqui nulla major obligatio est , quam quæ à liberis parentibus debetur . A Deo Dii nostri sunt . Quod sumus , quod vivimus , quod movemur , paternum beneficium est : atque hujusmodi beneficium , ut Compensationem non admittat . Nunquam enim posse accidere ut filius procreet patrem . Quod ad matrem spectat , quid ipsa nutrimenta ? quid infantium dulces injuriæ ? Cogente Naturâ , infantes de matre sumunt quod bibant : & non nato dente , hoc sibi , currentibus labris , eliciunt

ciunt quod non sit necesse mordere ,  
inquit is cui ascribitur epistola Hiero-  
nymi , de honorandis parentibus. Et  
adjicit : Ideô parentes debent haberi  
dulciores , quia per alios reparari non  
possunt. Et cum eos lex Naturæ sub-  
traxerit , nec patrem tibi alterum po-  
teris invenire nec matrem. Quæ esset  
igitur invidia , si ( ut ille alter Plato )  
exigua , pro amplissimis : pauca , pro  
multis penderentur ? Quicquid posse-  
mus unquam ( quod Seneca adducit in  
contrarium , Scholastice dicit ) nihil  
est præ hac luce , præ educatione , li-  
bertate , civitate , & præ iis quibus  
perpetuo sustentamur , paternis , avi-  
tisque bonis : quæ omnia certe bene-  
ficia sunt parentum. Sed quid Origi-  
nes ille , qui quando bene , nemo  
melius ? Is , homilia 11. in Leviti-  
cum , sic scribit : Nomen patris grande  
mysterium est : & nomen Matris , ar-  
cana reverentia. Pater tibi secundum  
Spiritus , Deus est : Mater , Jerusalem  
coelestis. Primo tibi pater Deus est ,

qui genuit Spiritum tuum: hinc, *Filios  
genui, & exaltavi*. Secundo, pater  
tibi carnis est pater, cujus mysterio in  
carne natus es, atque in hunc mun-  
dum venisti: qui te portavit in lumbis.  
Quia igitur tam sacratum est nomen  
patris, & tam venerabile: idcirco qui  
maledixerit patri, morte morietur.  
Similia de matre existimanda sunt,  
cujus labore, cujus cura, cujus mini-  
sterio & natus & nutritus es. Quare  
oportet, te, secundum Apostolum,  
parem gratiam referre parentibus. Si  
enim dehonoreris patrem carna-  
lem, hujus contumelia ad patrem Spi-  
ritus redit: & si injuriam feceris matri  
carnali, ad illam matrem Hierusalem  
coelestem redundat injuria. Ideoque  
nullo genere, adversus patrem aut  
matrem, ne verbo quidem habendum  
est certamen movendaque contro-  
versia. Pater est, mater est. Ut ipsis  
videtur, agant, faciant, dicant, ipsi no-  
verint quantumcunque detulerimus  
obsequii: nondum reddidimus gratiæ  
vicem,



vicem, quâ geniti sumus, quâ portati, quâ haufimus lucem, quâ nutriti sumus: fortassis & eruditis & honestis artibus eruditi. Imo plerunque ipsis auctoribus agnovimus Deum, ad Ecclesiam Dei venimus, & sermonem divinæ legis audivimus. Quod si jus istud cum divinum, tum naturale atque ea mutua beneficentia transit ad bruta quoque animantia: homo quem Gratia aluerunt, cui nativa est urbanitas, cederet leoni, ciconiæ, pardo? (de ciconiis, de hirundine, pulchrè Ambrosius lib. 5. exame. cap. 16. & 17.) *Et si ( ut ait Epictetus ) Natura non exigit, quis fiet pater, probus an improbus: vilior an honestior sit, perpetuo pater est:* neque ea deficit unquam obligatio, quam procreando contraxit: is, si quid voluerit, jussit, potestne ullo casu dubitari, sit id faciendum, nec ne? Liberto, & filio semper honesta & sancta persona patris ac patroni videri debet, inquit Ulpianus. Sin aliquis objiciat quod quondam

Diogenes Zenoni, generatione liberos parentibus non teneri: propterea quod ea non ex affectu proficiscitur, imo ex voluptate: & qui dat operam liberis, cum hoc maxime agit, aliud agit: generationi non incumbit; sed voluptati: bene est, si Cynicos placeat esse: si vel à bestiis arcere hoc munus (quæ ipsæ tamen, cum lege Naturæ, & destinato tempore ad procreationem misceantur) inquit Athenagoras) non tam feruntur appetitu, quam desiderio catulorum) bene est, si jam nulla sit differentia inter copulationem animalium, & eam quæ nostra est: si dixerimus, matrimonium non amplius esse juris Gentium, sed Naturalis: si Christianis desiisse esse sacramentum. si sit denique contumelia, non fœdus. non divinarum, humanarumque rerum: sed voluptatis societas, ac communicatio quædam. At qui ista sentirent de nuptiis, aut facerent infcîi, aut tædio tandem solitudinis ingrata, ac injucundæ. Verum

rum Socrates, apud Xenophontem Diogeni abunde satis fecerat. Quid nuptiæ erant necessariae, si (inquit) procreatio liberorum ex sola libidine proficiscitur? passim poterat expleri. Sed quod nos subjecimus matrimonio, (oneri aliqui duro) fecimus liberorum procreandorum causâ. Non enim tam solliciti essemus, uxor quætatate esset, quo genere, quibus moribus: sed & natos ex eo matrimonio non educaremus ea curâ, non erudiremus: collocaremus etiam vicissim, si sola libidine ac voluptate ducere-mur. Quam Philo ille divinius, qui de fœdere isto sic pronunciavit in Dialogo: *Parentes gignendis liberis subministrant Deo. Ambo filiationi conferunt: hic corpus, ille animam* (propterea Ignatius, ad Philadelphenses, parentes, Dei cooperatores appellat: & ea ratione, *homo Dei imago est*, inquit Clemens Alex. lib. 11. Pedag.) Qui itaque alterum negligit, negligit utrumque, aut qui contem-

nit operarios, artificem, contemnit. Imo vero (ait Philo) operarii non sunt, sed Dii quidam inter nos: qui dum gignunt, Deum ingenitum imitantur. hoc differunt, quod Deus, Creator universalis est: pater, singularis. Ille, omnium: hic liberorum duntaxat. Quo fit ut necessario (inquit sit impius erga Deum invisibilem atque incomprehensibilem, qui erga hos Deos præsentem, conspicuos, ac familiares officia omnia non exercet, Id ipsum erat in Johanne, epistola 1. cap. 4. SI QUIS DIXERIT, DILIGO DEUM: ET FRATREM SUUM ODERIT, MENDAX EST. QUI ENIM NON DILIGET FRATREM SUUM QUEM VIDET: DEUM, QUEM NON VIDET, QUI DILIGAT? Per amorem Dei, amor proximi gignitur: per amorem proximi, amor Dei, nutritur, inquit Gregorius Magnus lib. 7. moralium, cap. 10. Sed & ille Legislator Judæorum cum inter sacra præ-

præcepta id primum collocasset quod de Deo est, & quod ad ejus honorem pertinet: eadem repetendo in Levitico, incipit à parentibus. Hoscoli, hos honorari jubet: postea, de Deo similiter imperat: quasi Dii sint æquo: & valeant in omnem sensum hæ binæ definitiones, QUI HONORAT PATREM ET MATREM, HONORAT DEUM: ET, QUI DEUM, NECESARIO PARENTES, Equidem Xenocrates Philosophus, cum scriberet, tria tantum extare præcepta in templo Eleusinae apud Athenienses de Triptolemi legibus: incipit à parentibus, inquit Hieronymus adversus Jovinianum: Honorandos parentes: venerandos Deos: carnibus non vescendum. Et Plato ille divinisissimus, (quem possumus vere alterum Mosem appellare) postquam de Deo multa conscripsit: Ea sunt (inquit) non tam profecto leges, quam præludia & exordia legum quas laturi sumus.

sumus pro parentibus. Qui patrem coli effatur, præfatur Deum. Quam sanctè præ Teleucro, qui licet considerans pietatem, interrogatus, cur juvenes apud Lacedæmonios, senioribus assurgerent? respondit, ut hæc assueti in extraneis, patrem & matrem venerarentur tanto magis? Certe quidem pater (ut lib. de oratione Tertullianus ait) & pietatis & potestatis appellatio est. Qui igitur hanc aut illam tolleret: aut qui plus tribueret pietati, quam potestati, vel ex adverso, tolleret utrumque: tolleretur omnem eam prærogativam quam pater à Natura, à Deo, ab hominibus accepisset. Atqui, si pietas est perpetua: si prævalet semper: si nullo casu perdit officium suum (hinc, qui consecratus est Pietati, & Alemonæ locus) cur aliud de potestate diceremus? cur ubique non valeret? Quæso, consideremus quo bonum sit argumentum quo Tertullianus vult evincere, Christum Deum esse, non Patrem,

Patrem, sed Filium. NON VENI  
(inquit) FACERE VOLUNTA-  
TEM MEAM, SED PATRIS  
QUI MISIT ME. HANC  
ADIMPLEVIT USQUE AD  
MORTEM. Ergo non erat Pater,  
sed filius. Quam vim haberet ea ar-  
gumentatio, si voluntas filii alia à pa-  
tre aliquando esset? Quid majestatis,  
quid amplitudinis adjiceret Deo sum-  
pta à nobis patria ista cognominatio  
(nam qui aliter se sensui nostro sub-  
jiceret?). Si verbo nulla proprietas  
esset, nulla substantia? Si à liberis,  
parentes à parentibus, liberi sola ap-  
pellatione distinguerentur: & varii  
essent, non jure, sed nomine dunta-  
xat! At, cedo, qua alia re jam di-  
stant? Emancipatio non necessaria  
est amplius. Si post ventrem filius sta-  
tim loqui posset: qui mores nostri  
sunt, sic diceret: Te ad hoc cogno-  
sco, (pater) ut nutrias me. Ingenuum  
edidisti: & post duodecim, aut qua-  
tuordecim annos, mea vitæ electio  
est,

est, non tua. Modo in corpus nihil ausim consulto : ingratus , officio-  
susve sim; quis inculcabit? Abrogata  
est patria potestas. Quod si Nemesis  
obtenditur : lucrum est in mora. Ve-  
runtamen ut hæc sola esset persuasio ,  
quod qui offendit patrem, Deum re-  
vera offendit : quod , interdici aspe-  
ctu patris, præcipua poena est : deni-  
que quod ejus imprecationibus affici,  
nihil filio tam horrendum (ut de ea re  
postea amplius) ea satis adhuc suffi-  
cerent vallandæ ac sustinendæ ejus  
potestatis, quam tamen sic prostratam  
ac diminutam hodie quærimus. Sed ,  
quæ depravatio est, certe ea non suffi-  
ciunt. Prævaleret antiqua illa severi-  
tas Romanorum : hoc est, *Lex inde-  
mnatorum*, de qua & Halicarnassæus  
ille, & Quintilianus sæpe. Cur ita?  
Respubl. nihil est aliud quam pluri-  
um ædium privatarum collectio in  
unum. Porro, ejus incunabula sic  
incipere à parentibus, ut qui dixerit,  
familiam, tanquam genitale solum,  
ma-



matrem, radicemque esse: Rempub, vero, coloniam: verissime & aptissime dixerit. Qui itaque civitatem optime institui velit: qui ab ea pelli lasciviam, qui crimina ac facinora omnia: provideat domesticæ disciplinæ. Si domi modestos fecerit, si continent, si paratos ad obediendum: migrabunt in Rempub. eâ naturâ, eâ informatione, eo animo. Mutabunt limina, non mores. Contra, eam molliter curet: ducat loris mollioribus prodiones, cedes, rapinæ, adulteria scaturient in continenti. Hinc factum est (opinor) cur ultra illam potestatem domesticam, quasi ea per se imbecillior esset: Lares eo amplius præposuere domesticis ædibus, ut pietatem Religio stabiliret: perficerentque ambo, tanquam validissima retinacula, ut quemadmodum infans digitulo ductus, ad extremum solitarius ambulat: sic vir in Repub. beneficio privatæ disciplinæ, sibi lex, formulaque esset: putaretque.

retque Magistratui apponi fasces, non terrori, sed ornamento. At me herculè nihil absurdius, turpiusve est, quam aliquid hîc Religioni imputari. Nam (si verum est quod jam antea attigimus) Religio Christiana plus destruit hanc potestatem, quam erigit ac confirmat: nihilque liberos nostros tam avocat à pietate & officio, quam quæ nunc collocantur ut contraria, *Deum colere, & colere parentes*. Mirum profecto? Præcepta quæ conveniebant, & quæ una poterant impleri, dicuntur hodie opposita, & ea sic pugnare invicem, ut qui pareat uni, alterum violet, Unde axiomata tam nova & inaudita? Ex ea, quæ & quondam fuit, disputatione Philosophorum: videlicet, *An semper atque in omnibus jussis patri parendum esset*. Nam quemadmodum fuere qui ita tractarunt hanc quæstionem, ut Bias sacrilegium: Nullus (inquebat) est sacrilegus. Nam si omnis locus est Deorum: fur nihil transfert ex loco sacro,

facro, quin in sacrum non transferat :  
Sic de patria potestate Philosophi illi  
subtiliter : Nihil (ajebant) patri ne-  
cesse obsequi. Nam aut recte impe-  
rat : & istud faciendum est, non quia  
jubet, sed quia jus est. Aut perpe-  
ram & nequicquam faciendum : quia  
fieri id per se non oportet. Parendum  
itaque nunquam. Atqui non erat in-  
tegrum dilemma, inquit Gellius.  
Esse enim quædam *μὲλᾶ*, atque *ἀδία-  
φογᾶ* in quibus propterea parendum  
est omnino. Deinde, quod sua vi,  
naturaque sua bonum & honestum  
est : eo magis etiam faciendum, quia  
amplius jubetur. Alii contra distin-  
guebant : In quibusdam parendum :  
in quibusdam minime. Quid enim si  
proditionem patriæ, si necem matris,  
si Principis, si alia quædam turpia,  
& impia pater imperaret ? Sic ubi  
apud Theologos cœpere hæc agitari :  
*Possitne quis simul Servire Deo, &  
hominibus, an, Deo magis quam pa-  
tri* (quasi ultia esset dubitatio pro  
Deo,

Deo , si quid imperaretur impium) incidimus in pares sententias Philosophorum , hoc est , varias , inutiles , infames. Certe eos non detestor qui separarunt turpe ab honesto : à justo quod injustum est. Neque eos etiam omnino , qui constituere quædam indifferentia & media Est quod possit aliquo modo excusari. Sed tutius fuisset procul dubio , si in ea re nihil movissent : hoc est , si ab eorum sententia non discessissent , quæ erat una , & singularis , videlicet *omnibus quæ pater imperat , parendum*. Nam ut vera sint quæ cavillando distinxerunt : versantur nihilominus in proclivi , & talium quæstionum periculosissima est definitio. Quam cautius , prudentiusque Philo ille in Decalogo , qui ad prima capita utriusque legis sic divinissime , ut omnia : qui relictis aliis omnibus negotiis solo se divino cultui applicant : aut qui , relictâ sanctitate solis parentibus , solive

solive hominum societati , quasi aut Dei , aut hominum solummodo amatores : semiperfectæ sunt virtutis. Imo , qui partem alterutram læserit , ambas læserit. Plane sunt quæ nunquam in medium adduci possunt , quin noceant statim. Timentur jactata : examinata amittunt fidem. Quæstiunculæ cibos imitantur. Nam ut delicatiores facilius putrescunt : sic nimis agitatæ ac distinctæ vitiant regulam. Si sub sit Concilio Pontifex : si populo , Imperator : si Regno , Democratia antefertur : si in Religione , opposita admitti possunt : prima fronte pulcherrime hæc tractantur , sed virus in conclusione est. Nam ex his disputationibus primo quoque die emergunt schismata , seditiones , bella civilia. Quæstio qua de agitur , est ejusmodi. Qui enim semel dubitavit , Reverentia , atque obedientia domestica an perpetua debeat esse : neque adversus Tarquinium amplexus est sen-

sententiam Turni : *Nullam brevior  
rem esse cognitionem , quam qua inter  
patrem & filium : paucisque verbis  
transigi posse. Ni pareat patri , habendi  
um infortunium quomocunque ;  
Naturam semel violaverit , læserit : in  
continenti lædet opprobrio , lædet  
vulnere , lædet parricidio : & à patre ,  
facilis erit inobedientia in principem.  
Prævalebat igitur hæc determinatio  
antiquiorum Philosophorum : OMNIBUS  
QUÆ PATER IMPERAT , PARENDUM. Aut  
sane ; si quid in contrarium accideret  
utilius erat hoc unum pro ut esset ac-  
cipere : quam ex particulari quodam  
negotio , disputare contra commune  
præceptum , atque id sive in schola ,  
sive in foro , sive in Ecclesia definire.  
Hoc Cicero prudenter in Officiis :  
nemo enim ibi legerit has quæstiones.  
Ratum , transactumque habuit , nun-  
quam primas partes filio dari oportere  
re , ut nec subdito adversus Principem : servo , adversus dominum : discipulo ,*

cupulo, in Magistrum. Non quod non mente & ratione prævaleant quandoque sed quia in ipsa comparatione & oppositione personarum, inest læsio & injuria. Jus quod deprimitur, auferitur. Romæ in centum virali judicio, quo Accia Variola arguebat testamentum patris, Prætorii viri ob immodica legata quæ effuderat in novercam: tot patres, tot filii familiâs affuere, anxii vicissim ni aliquid patri, ni filiæ contra, præcipue tribueretur: ut judices sapienter (inquit Plinius) reliquerint rem indecisam, ne esset, quo liberi ullo casu sese parentibus anteferrent. Sed ut brevius agamus: in his quæstionibus quos potissimum sequemur? Philosophos, an Apostolum? Hic ita ad Collossenses: *Filii obedite parentibus, per omnia: hoc enim placitum est Domino.* Cum expressit hanc clausulam *per omnia*: nonne illa duo explosit, in quibusdam parendum, aut non parendum? & rursus. *Nihil necesse est obsequi?* Imo vero, cur

cur Deus, pater omnium parentum, prohibuit Adamo, ut de fructu arboris comederet: nisi ut experiretur an ei in omnibus obediret, inquit Theophilus ad Autolyicum? Nec movet quod obijciatur: Quid ergo si pater prodicionem imperaret? quia fingere est quæ non contingunt, aut ita raro ut debeant negligi. Contra, perpetua præsumptio est, quisquis sit paterfamilias, probior aut improbior, nihil eum filio unquam mandaturum, quod turpe, aut iniquum esse certo sciat. Etiam impudica filia imperat pudicitiam. Præterea, qui disputat de jussu: assignat (quæ Naturæ non respondent) senectuti, ignorantiam: adolescentiæ, consilium. Facit filium Judicem, sintne paternæ actiones justæ, an injustæ: rectæ sua sponte, an per interpretationem. quæ omnia naturæ & honesto non conveniunt. Serit ibi jurgia & lites, ubi una virtus debuit esse (quæ fuit præcipua Lacedæmoniorum) videlicet obedire, & sine



sine cunctatione obedire. Sed quia error invaluit, & jam difficile cicatrix obduci potest: videamus quæ erant illa media, atque indifferentia, de quibus Gellius. Ut si (inquit) pater imperaret ire in militiam, rus colere, capeßere honores, causas defendere, uxorem ducere, quo jussu est proficisci: accersitum venire, & alia hoc genus, quæ ipsa per se neque inhonesta sunt, neque turpia: sed perinde ut geruntur, ita ipsis actionibus videntur aut probanda, aut reprehendenda. Nam si contra imperaret uxorem ducere infamem, propudiosam, aut criminiosam: si pro Catilina, pro Bibulo, aut Clodio causam dicere. quia hic numerus turpitudinis accederet: quod juberetur, desineret esse ἀδιάφορον. Si itaque hæc placerent; finita esset quæstio, quousque necesse sit obsequi: nisi quod quæ Gellius diserte pronunciavit esse indifferentia, nempe uxorem ducere, & capeßere hoc aut illud vivendi ge-  
C
nus:

*nus* : hodie prædicantur esse huiusmodi, ut in iis nihil adferat consensus, auctoritasque patris : possit filius familias ducere uxorem : se dedere Ecclesiæ : possit Monasterio, non modo spretis parentibus, verum etiam invitis, atque expresse prohibentibus. Quod omnes Academiae, quod fora, quod judicia omnia, sine provocatione, Naturæ & Pietati tribuebant : abiudicant Religione & fide. Sed de voto hîc (quæso) potissimum. Nam aut tua accusatio est, qui, me inconsultò, te addixisti Jesuitis : aut mea in contrarium, qui, si id tibi permittit Ecclesia, ex ea re doleo tamen. De matrimonio, Paquerius noster sic erudite in epistolis, ut qui lineam præterea apponat, magis officiat sibi, quam picturæ. Id ei certe suffragatur, quod Patres in Synodo Tridentina tandem magnifice decreverunt : Licet nuptiæ clandestinæ (quales sunt quæ sine consensu patrum contrahuntur) tamdiu pro nuptiis

ptiis habeantur, quamdiu eas non improbaverit Ecclesia: nihil-ominus eam justis de causis tales nuptias prohibuisse & abhorruisse in universum. Ratæ, irritæve sint omnino: legitimæ, aut illegitimæ: vult sui arbitrij esse, non parentum. Suffragatur Christianorum Principum constitutio, quæ talem conjunctionem jubet Raptum esse, non *Nuptias*: aut si sint, distrahit gladio. Duo tamen adiiciam, non eo fastu, arrogantiae, ut ex his quicquam in eo contractu confirmem, aut infirmem, quæ vel Ecclesiæ, vel optimis Principibus nostris prudentissime placuerunt: sed ut liberi nostri hoc semper habeant in ore. Non omne quod licet, honestum est: caveantque, ne, quâ fuerint despicientiâ, contumaciæve in parentes, eâdem (quæ diviina est ultio) sint erga se etiam sui. Unum est de Rebecca, & de filia Thamnathei, quas licet Deus ipse destinavisset: Samsoni hanc, Isaac alteram: voluit ta-

men matrimonia ista fieri paterno voto & arbitrio: Rebeccam postulari à Bathuele, matre, & avunculo: nec mandato, aut internuncio filii, sed Abrahami. Innocens eris (inquit ille ad servum) à maledictione mea, si veneris ad proximos meos, & hi non dederint tibi. Angelus Domini præparavit eas nuptias, patres contraxere. Alterum est Tertulliani ad uxorem: *Unde sufficiam* (inquit) *ad enarrandam felicitatem ejus matrimonio quod Ecclesia conciliat, & confirmat oblatio, & obsignatum Angeli renunciant: pater rato habet? Nam nec in terris filii sine consensu patrum ritè & jure nubent.* Hoc innuit procul dubio: Nuptias Christianorum eo feliciores, beatioresque esse, quo à Deo magis comprobantur: quibusve, ut in sæculo parentes, sic in cœlo consenserit Deus. Idem sub Commodo visum est Sotero, idem Evaristo, & Ambrosio.

Agamus itaque de votis: non, si ea valeant ipso jure. Nam id pie habemus

pro

pro constanti. Neque etiam, si vita Religiosorum, imo si Ecclesiasticorum omnium purior, beatiorque est vitâ & conversatione Laïcorum. Nam neque id reddimus controversum. Romanos non imitamur, qui Magistratum Pontifici anteponebant: Sed vel Judæos, qui Levitas: vel majores nostros, qui Druidas Magistratui: imo etiam Chrysostomum, qui vel Principi Monachum anteponebat. Quin id agamus (inquam) an in votis celebrandis liberum sit arbitrium libero- rum. Denique uno verbo, An filius possit vitam Ecclesiasticam profiteri, inscio aut dissentiente patre: hoc est, si, quemadmodum in reliquis sacramentis, quo rata ac perfecta sint, quædam insunt legitima ac solemnia: sic in Sacramento Ordinis necessaria sit exhibitio, & oblatio patris. Ita nos de ea re quidem, ut est mediocris Jurisconsulti secretiora vestra aut scire, aut capescere. Quod si vel Theologia ipsa, vel illi tui sollicitatores

aliquid habent magis absconditum, quo possint mihi abunde satisfacere: fac intelligam primo quoque die, ut, quod ad me attinet, definitioni eorum acquiescam: tu contra, desinas latitare: quinimo palam, & cum fiducia occinas illud quod depravatum ex D. Hieronymo fortasse tibi sæpe obiiciunt, solum pietatis genus est, in hac re esse crudelem. Videamus itaque imprimis quæ voti observatio esset Paganorum. Nam etsi à vero cultu aberrabant, nihil tamen in Religione sua prætermiserunt (nescio an superavere nos ipsos) quod ejus honorandæ, tutandæ, amplificandæque esset. Sese, an sua voverent: præterea in quam causam, nihil intererat Paganis. Semper nihilominus quæsitum esset, valuissetne votum sine consensu & voluntate patris. Profecto si ageretur de immolandis liberis, certum est oportuisse eos offerri à parentibus. Patet ex Tertulliano ipso in Apologetico: cum (inquit) propriis filiis

fiis Saturnus non pepercit , extra-  
neis quoque perseverabat non par-  
cendo : quos quidem ipsi parentes sui  
offerebant , & libentes exponebant ,  
& infantibus blandiebantur , ne im-  
molarentur lachrimantes : Patet ex  
Plutarcho lib. de superstitione , in  
fine. Nullive essent qui traderent ?  
vulgare est quoque , non fuisse in po-  
testate aut arbitrio Sacerdotis , quem  
sumeret eo casu ad sacrificium. Fun-  
ctio erat Magistratus : qui , hoc am-  
plius , virginem sortiebatur , ut Dii  
ipsi sibi hostiam legerent , non Sacer-  
dotes. Quem Dii sorte declarassent  
( ut qui Athenis Minoi pendebantur )  
hæc destinabatur sacrificio : qualis a-  
pud Homerum , Iphigenia , filia A-  
gamemnonis : apud Pausaniam , filia  
Lycisci & Aristodemi : apud Plutar-  
chum , Sminthei , quam Delphini  
cum Eualo amatore suo , exposuere  
in littore. Hinc & ea declamationum  
argumenta : *Virgo immolata pestilen-  
tia : Abdicatus immolandus : Soror*

*infamis immolanda* : quas legere est partim apud Quintilianum (quem primi restituimus) partim apud Calphurnium, quem & Pithæus ille doctissimus. Sed in iis præcipue observandum, quod si filius, aut filia offerrent sese, parentes eis opponuntur ut contradictores iusti ac legitimi. Nemo enim eos admisisset, ne in schola quidem, si licuisset filiis familias sacrare se sua sponte. Hinc est apud Philostratum, Meneceum, filium Creonis ex responso Tiresiæ vatis, sese immolasse in scio patre, cum id vellet prohibere. Verum memorabile est omnino quod libro illo de superstitione Plutarchus inquit : Si qui liberos non haberent, consuevisse emere ab humilioribus. Sed eo casu non sufficere, si pater ille venalitius sacrificio interesset. Matrem naturalem adesse necesse fuit, ut morti consentiret, aut obsisteret. Virgilius ipse, lib. 11. Æneidos tangit ea sacrificia, cum Metabum introducit, filiam fluvio Amaseno immit-



immittentem : itaque effatur.

Alma tibi hanc , nemorum cultrix Latonia  
virgo.

Ipse pater famulam voco.

Quo loco & Servius : Bene , *ipse*  
*pater* , quia auctorandi potestatem ni-  
si patres non habent. Sed & Plutar-  
chus , lib. de Iside & Osiride , sic allo-  
quitur Cleam. sacerdotem : Parentes  
te à pueritia dedere huic Osiridi Deæ.  
Et de Græcis quidem hætenus. Quod  
attinet ad majores nostros : Gallo-  
rum ( ut hodie quoque ) tria erant ge-  
nera. In iis primi erant Druidæ : qui  
quia tractabant res sacras , atque Re-  
ligiones interpretabantur : tanto e-  
rant honore , tantamque habebant  
immunitatem omnium rerum , ut  
omnes certatim ad eos concurrerent,  
iisque adscribi, adscisci vellent. Quid?  
an & filii familias sine consensu ac vo-  
luntate patrum ? Nequaquam, ut his  
verbis Cæsar manifesto indicat. *Tan-  
tis ( inquit ) excitati præmiis , multi sua  
sponte in eorum disciplinam conveni-  
unt :*

*niunt : multi à parentibus , propinquis-  
que mittuntur.* Sponte , qui erant sui  
juris : missione qui alterius. Inter Ro-  
manos , titulus est Digestorum , qui  
inscribitur , *De pollicitationibus.* Ibi  
hæ præcipue memorantur , quæ Diis ,  
quæque Reip. fiunt. Atqui eas nul-  
lius momenti esse , quæ fierent à fi-  
liis familias , sic docet Ulpianus : Voto  
patres familias obligantur : puberes  
sui juris. Filius enim familias vel ser-  
vus , sine patris dominive auctoritate ,  
voto non obligantur. Certe in patre-  
familias pubertas desiderabatur. At  
in filio , cujuscunque is ætatis esset ,  
& sive peculium haberet , sive non :  
nullum erat votum , nisi auctoritas  
patris accessisset. Quam obrem ? quia  
qui non est sui juris , neque se neque  
aliud quicquam potest obligare. Præ-  
terea , qui jus habet in re , id sine facto  
suo non amittit. Itaque filius fami-  
lias , ut pie ac religiose ageret yoven-  
do rem alienam : furtum , injuriarve  
commisisset. Si bona : quia ad par-  
trem

trēm pertinebant : si ( quod magis est )  
personam : quia , ultra quod subdita  
erat potestati alienæ , parentes con-  
secratione ista , hæredem , spem ge-  
neris , propagationem nominis ac fa-  
miliæ amisissent : ea denique bona at-  
que emolumenta omnia quæ sibi per  
liberos acquirebantur . Itaque in vo-  
to filii necessarium erat arbitrium ,  
judiciumque patris . Summa quidē  
interpretatio est quæ pro Religione  
facit : sed non ea certe quā solemnia  
& legitima omittuntur , nam eo casu ,  
magis polluitur , quam augetur . Par  
patris erat auctoritas , quæ Reip. At-  
qui est apud Livium : cum P. Corne-  
lius Scipio , Prætor in Hispania , inter  
ipsum discrimen pugnæ vovisset lu-  
dos ; & post victoriam postulasset à  
Senatu , ut ad eam rem pecunia sibi  
decerneretur : respondisse , *Ejus quod*  
*& sua unius sententia vovisset , sena-*  
*tum non teneri . Itaque aut faceret pro-*  
*prio sumptu , aut de manubiis , si quid*  
*reservasset . Posset filius de bonis pa-*

tris, atque eo inconsulto : quod neque summus Magistratus, sine consilio? Quod si de Vestalibus obiicitur, videri se religioni potuisse dedere invito patre, quia *capi*, non *legi*, dicebantur : ideoque Pontifex Maximus eas non acciperet, sed raperet à parentibus : non valet à notatione ista argumentatio. Nam tantum abest ut hæc clausula Pontificia, *Amata te capio*, notaret aliquid invitum, aut violentum : ut contra hoc quod volumus potissimum confirmaret. Non erat acceptio sine deditio. Sic Pontifex eam certe capiebat quæ Vestæ addicebatur : sed à patre datam & oblatam. Hinc Metabus ille apud Virgilium : Accipe, testor, Diva tuam. Sed hoc Gellius diferte, lib. primo. *Capi autem virgo propterea dici videtur, quia (inquit) Pontificis Maximi manu prehensa ab eo parente in cuius potestate est, veluti bello capta abducitur.* Et paulo ante, cum recitasset solemnitatem legis Papiæ, quæ lectio, sortitio-  
que

que inducebatur : Hodie (inquit) si quis honesto loco natus adeat Pontificem, atque filiam suam offerat ad Sacerdotium: tam legitima professio est, quam si omnia ex lege Papia intervenissent vel accessissent. Atqui tam necesse erat filiam familiam offerri à parentibus, ut ea aliter non legeretur, quam si patrima, matrìmaque esset. Nam si esset emancipata, aut pater ejus emancipatus: etiamsi vivo patre in avi potestate esset, rejiciebatur. Cur ita? nonne potuissent exhiberi ab avo? nonne à tutore, aut curatore? ea ipsa: sui juris esset, num potuisset vovere sese? Non licebat, ut à Labeone Antistio dicebatur. Propterea sese: quia sex annorum minor, nec major decem non capiebatur. Ut alii vero eam traderent: non erat qui id tam posset sine exceptione, quam pater. In aliis, necessaria erat causæ cognitio: in patre, nulla. Nam ut omnis bona causa erat adoptionis, quæ fieret à patre naturali: sic erat consecrationis.

onis. Quid enim si filia voluisset discedere à Vesta? & avo, aut tutori objicere, Non satis habuisse potestatem, qui & vitam & statum commutarent? Jus hoc in eo esse qui vitæ ac necis habeat potestatem. Ergo in patre duntaxat, quia nec avo quidem compete-  
bat, inquit Seneca? Sane qui sæculo exemptam applicat Deo, is ei vitam vitalem quodammodo adimit, imo & quasi patriam ipsam. Merito itaque solius patris hæc auctoritas debebat esse: & quæ usurpabatur à Pontifice, invalidam existimabant, nisi à patre cessa esset & accepta. Porro non est quod quis dicat, id locum habuisse duntaxat in Vestali, & præcipue ob eam minorem ætatem quæ legebatur Sacerdotio. Nam & ex his verbis quæ sunt apud eundem Gellium: *Plerique autem capi virginem solum debere dicunt.* Sed Flamines quoque Diales, item Pontifices, & Augures capi dicebantur: manifesto apparet, idem jus fuisse in masculis, si filii.

si filii familias caperentur. Nonne cum apud Dionem legitur ea contröversia, Quæ fuit de Cornelio Spintere in collegium Pontificum asciscendo, licet Faustus, qui erat ex eadem gente Cornelia, jam in eo esset Pontifex: ideo utrique patres, naturalis & adoptivus, cooptionem præcipue defendunt, quia filium collegio offerrent, non filius sese? Profecto, nati non poterant exire patria potestate, quin pater auctor esset quod tamen accidisset, si sine consensu patris hæc vota liberorum valuissent. Verum ut sensim ad Christianismum accedamus (neque enim fortasse Paganica exempla te moverent) quæ erat in hac quæstione lex, aut consuetudo Judæorum? In primis nullo casu aperte filio dicitur, *Relinque patrem & matrem*, nisi ut adhæreat uxori. Si quid alibi est hujusmodi: consilium est, non præceptum. Res datur disquisitioni, ut nos alio loco diffusius. Jubetur hîc, sine exceptione,

tione, fieri cum natura divortium. In aliis casibus, tam caute tam pedetentim, ut tutius sit à recta via ac regula non discedere. Veruntamen quicquid de ea discessione enunciatum sit ab Adamo: an propterea valet, quod obligatio maritalis major, auctiorque videatur esse, quam patris? Imo hæc originem habet à Natura: proficiscitur ex suitate & identitate. Illa, ex humana ac politica societate duntaxat. Quod maritus & uxor pro uno veluti habentur: fictione & imaginatione fit. Itaque facillime segregantur, ut & Anastasius inquit, lib. 10. commentariorum in Hexameron. At filius, os ex ossibus, caro ex carne est penitus. Una & eadem persona est cum patre: ejusdem substantiæ, ejusdem corporis & animi quasi delibatio quædam: quo fit ut nihil possit extrinsecus accidere, quin filius perpetuo sit filius. Quæcumque abdicatio, expositio, venditio, emancipatio, aut adoptio interve-

niat:



niat : semper prævalet Natura. Jus sanguinis nunquam immutatur. Filia, licet exposita à patre, ante Constantinum, ne poterat quidem nubere sine consensu patris. At uxor, desinit esse pluribus modis : re judicata, infantiâ (ut constitutum est à Leone) Separatione, servitute, divortio. In liberis hoc mirifice accidit, ut, quam extincta principali obligatione, maneat pignoratitia, Perpetua sunt pignora Naturæ. Cur itaque filius deserit patrem & matrem ut adhæreat uxori ? cur omittit quod majus est : quod minus est, amplectitur ? Quia, hoc casu, parentes id volunt tacite : & propter commune votum propagandi generis, quod nos liberi derelinquant, volentibus & consentientibus hoc faciunt : ut videlicet, quemadmodum nobis hi proxime succedunt, sic eis fiat vicissim. Veruntamen, seorsum habitare cum uxore : an est parentem deserre, aut relinquere ? Imo in hoc maxime

obediunt liberi, quod si matrimonia contrahunt, si familias alienas, tanquam colonias, inchoant: faciunt voluntate atque arbitrio parentum. Quo modo, *dare operam uxori*, esset deciscere, ac discedere à patre: cum liberi matrimonio non acquirerent emancipationem? cum maritus & uxor non minus essent in potestate patris? cum jura naturalia ac civilia nuptiis non immutarentur? Ut ut sit, sententiæ Adami, Deus, qui, si liberi contraxerint matrimonium, si non, memor illius juris quod jam constituisset à Natura: sine exceptione addidit hoc oraculum. *Honora patrem tuum & matrem tuam.* præcise magis, quam si hoc modo, *Ei eaque obtempera.* Nam in reverentia, obedientia consistit. & est qui obsequi non tenetur, cui cultus tamen necessarius est. Exempli gratiâ: Si summo jure potes vel nubere, vel vitam monasticam profiteri me invito: ut votum, matrimoniumve quodammo-  
do

do subsistat : debes nihilominus , vi  
tanti oraculi , prius veniam à me  
impetrasse , prius consuluisse quid  
sententiam , prius denique docuisse  
quid te impulerit in illam , aut illam  
vitam : propensio , inclinatiove spon-  
tanea ac prudens : an circumventio ,  
persuasiove extranea & mendicata ?  
Eo omisso officio , & eo ritu : sit a-  
ctus tam legitimus , quam qui est ma-  
xime : ubi est , quem præscripsit Deus ,  
honor , reverentia cultus humanior ?  
Si id nisi ad solemnitatem intervenit :  
solemnitas dat esse rei. Pergamus.  
Est apud Marium Victorem , orato-  
rem Massiliensem , Tit. III. com-  
mentariorum in Genesim , Abraâ-  
mum , qui licet primo à lumine vitæ ,

Verum mente Deum venerans , gentilia sacra  
Aversatus erat :

**Dominum tamen non prius jussisse :**

Liqueret ut sedes patrias , terramque no-  
centem

Pollutamque domum , nisi (eum) postquam  
morte parentis

Jussa sequi jam posse Dei sine fraude liquebat.

**Quid**

Quid dicemus? an plus posse Jesuitas adversum te, quam Dominum in Abraâmum? Hic natus erat 75. annis, cum, nisi mortuis parentibus jussit ei Dominus, ut, patriâ relictâ, ascenderet in terram Cananeam: tu, natus 16. me, & matre tua vivis, quia id Jesuitæ jubent, & patrem & patriam deseris. Si alterius votî causâ: Id majus est quod mihi Natura, ac Deo jubente debes. Atqui vel Marius sub Theodosio & Valente fuit: Jesuitæ ante Franciscum I. regem nostrum non fuere. Deinde, cur eidem Abraâmo Deus imperavit, ut filium sibi immolaret, essetque sacrificii auctor: nisi quia, in omni causa liberorum, judicium patris debet adhiberi? Si nihil DEO interfuisset, quis, quæve sibi Isaachium immolaret: ac perinde gratum, justumque habuisset sacrificium, id pater, an alius fecisset: magis hoc alteri mandasset, quam patri. Non enim Religio sanctior, angustiorque est, quod sit conjuncta par-

parricidio. Quid igitur? Deus voluit sibi dedi Isaachium. Sed quia ista dedictio debet à patre proficisci : cum dare imperavit, qui, quia pro potestate, mactando non delinqueret. Pater non tenetur parricidii, inquit Martianus. Si in Isaachio, si in Samuele causaveris ætatem : quia essent videlicet impuberes, propterea fuisse necessarium ut patres intervenirent: filia Jephthei, quæ reapse immolata est (sic ut ab Eretheo, Praxithea : à Mario Calpurnia) erat apta matrimonio. Præterea, quid potest Elysæo obijci? Ad Prophetiam vocatus (quæ fuit vita quædam Regularis, ut unctione, pallio, & abstinentiâ apparet) etsi major annis, etsi ab Elia Propheta, etsi Deo mandante nominatim: attamen respondit. *Orote, patrem meum osculer, & matrem meam. Sic te sequor.* Osculum, erat benedictio patris, veniaque quam de eo exigeret prius. Quid Elias? *Vade, at revertere.* Quod enim meum erat, fecit tibi. Quasi diceret: *Quod super-*

*superest, pendet à parentibus. Nam etsi Deus expresse jussit, ut te ungerem Prophetam post me: quî fieret, si hi Dii secundi intercederent? Ergo postea quam Propheta eum induit pallio, continuo quidem Elisæus, misso aratro, Eliam est secutus. Attamen non prius discessit à parente, quam ab eo veniâ impetratâ. Equidem, sub veteri Testamento, personalia vota pecuniâ redimebantur: & quæ erant Nazaræorum, tempore finiebantur: Sed cap. 30. Numer. Tam manifeste scriptum est quid de filia esset observandum, ut turpe sit quæri aliquid in contrarium, *Mulier (inquit) quæ est in domo patris, si quidpiam voverit, seque obstrinxerit juramento: rea erit voti, nisi id fecerit contradicente patre.* Sed ne ætas obtenderetur: de uxore idem scriptum est, ut, sive adhuc esset in domo patris, sive deducta per maritum: votum non valeret cui maritus non consenserit. Moses nullam excepit præter repudiatam, aut viduam.*

duam. Unde hoc? an quia concurrente patria potestate, aut maritali, debitor est Divina? Minimè sanè. Sed, quia illæ ipsæ à Deo sunt, has stabiliendo confirmat suam. Atqui hæ exceptiones viduitatis, aut matrimonii non erant necessariæ in filio. Nam ubi primum desisset esse familia, nulla erat difficultas, si vir esset, quin iis votis rite se obligaret quæ in vetere Testamento admittébantur. Nam, excepto jejunio, aut ciborum abstinentiâ quadam, vix se alia re affligebant. Verum mulier (ut Romæ) erat in perpetua tutela, nunc patris, nunc mariti, nunc etiam fratris, si innupta patrem amisisset. Quapropter si quid fœminæ voverent, ibi Legislatores ille cautior ac difficilior fuit. Sed filius quamdiu mansisset in familia: quis dubitat eo casu quin fuisset in pari causa cum sorore? Pecuniam vovisset? erat aliena. An, (quod magis est) personam? erat alteri subjecta. Quomodo igitur qui  
non

non est sui juris, is sese obligaret, noceretque patri, qui omne in eum jus habebat? Turpe est dicere, præcipuum exemplum pietatis magis esse in foemina, quam in masculo. Nam, cedo: cur apud veteres ita ambigebatur, possentne liberi furiosi, aut mente capti contrahere nuptias: & de filia quidem consentiebant: de filio, tantopere dubitabant? Nonne propterea quia familiæ columna est masculus: quia gens in eo consistit, in eo stemmata, in eo imagines? Itaque magis provideri oportebat ne is indigne conjungeretur, in quo major reverentiæ obligatio est, cultus, officiique major? Si novas contrahat affinitatis nepotes, hæredesve novos parturiat avo: cur non hoc attentius, diligentiusve fiat? Nonne id etiam propterea, quia anni in filio non interpellantur: in filia, vel ante diem? Filius, ut moretur paternam valetudinem, fit eo tanto maturior, dignior, ac modestior. Quid? virtutes non minus domi



domi sunt, quam in foro necessariæ, ut olim à Catone dicebatur? At filia, morâ & expectatione depravatur. Id præclare Phalaris ad Cleænetam. Is, propter rationem quam diximus, jubet ne differat filiam viginti annorum collocare viro, quod pater Philodamus abesset. Longius eum navigasse, quam ut sine ætatis detrimento posset expectari à puella. De filio, contra censuisset. Sequitur itaque, quod Moses prohibuit in filia, prohibuisse in filio multo magis.

Sed expectas, imo exploras (ut opinor) qui descendam ad Christianismum. Bene est: huc nostra omnia & tendi & dirigi oportet. Religio Christiana (inquies) aliter statuit de pietate & obedientia quam mihi debebas à Natura. Videamus igitur an Christus propterea venerit ut eam destrueret, non perficeret: ut bonos mores, & quod sua sponte honestum est, violaret, confun-

D

funderet : ut præcepta Dei patris abrogando , liberis contumaciæ ac despicientiæ auctor esset : an denique ita sit imputatus , ut abolere necessitatum nomina , collidere pietatis affectus , charissimorum pignorum dissidia credatur mandavisse , ut ait Ambrosius in Lucam ? Initium faciamus ab eo ipso : postea veniemus ad Ecclesiam : in qua si Theologi vestri puriores aliquid habent quod sit profecto subtilius : obtineat sane. Nam etsi Christiani sumus omnes , non tamen omnes Fidei interpretes sumus. Ergo mysticoteræ ad Theologos : nos hîc , quæ trita ac simplicia. Erat annorum quindecim , cum ascendit Hierosolimam , Maria ac Josepho comitantibus , deseruit abeuntes. Itaque reversi ut eum disquirerent , tandem post triduum invenere in templo sedentem cum Doctoribus. Huic Maria : *Cur ita fecisti nobis ? dolentes quarebamus te.* Respondit suboscure , veruntamen ( nî fallor ) non minus appo-

apposite ad eorum sublevandam molestiam, quam ut de mea forte existimas: videlicet, *Iustus este obedire Deo, quam hominibus.* Attamen descendit, rediitque cum parentibus, venit Nazareth, ac fuit subditus illis, inquit Lucas in Evangelio. An eos postea deseruit unquam? minime: non usque ad mortem. Sed Bernardum Abbatem ultra (quæso) audiamus: Etsi Maria & Josephus verba Christi intelligerent (verisimile est enim fecisse) quia sic eos alloquebatur: *Nonne sciebatis, quod in his que Patris mei sunt, oportet me esse?* Attamen non acquievere, inquit Ser-mone 19. in Salomonem: voluere etiam obtemperare sibi. Itaque quam libet ætatem attigisset, eos deinceps perpetuo est sequutus. Iam liberis: à quo melior formula obedientiæ ac pietatis in parentes, quam à Christo? Disce (inquit Ambrosius, in hæc verba) quid parentibus tuis debeas, cum legis à patre filium, non volun-

tate, non opere, non tempore discrepare. Tu matri debes pudoris injuriam, virginitatis dispendium, partus periculum, matri longa fastidia, matri longa discrimina, cui miseræ in ipsis votorum fructibus majus periculum est: & cum ediderit quod optavit, partu absoluit, non timore. Quid anxios patres loquar pro filiorum profectu, & multiplicatos alienis usibus census, jactaque semina posterorum ætatibus profutura? Nonne pro his opsequia saltem oportere rependi? Idem de virginibus, lib. 1. Quam dulce pignus quod à periculo incipit, & in periculis desinit: prius dolori futurum, quam voluptati. Non dedignatus est (inquit Bernardus ille) Magister sequi discipulos: nō homines, Deus: non fabrum, non fœminam, verbum atque Sapientia ipsa. Et tamen Josephus proprie non erat pater. Implet Jesus voluntatem utriusque, tam cœlestis quam terreni patris: docetque manifesto, nihil impedire quin simul coli possint:

possint : atque ut istud pie ac rite fiat , non necesse esse pro altero alterum negligi. Certe ex hoc loco Justinus Martyr, quæstione 136. alios tractat sapientissime , ut omnia. Si parentes aspernari vetitum est divinis literis (inquit) & qui vetita fecerit , peccator appelletur : qui fit ut Dominus Iesus parentes suos pluribus locis aspernatus , dicatur nihilominus sine peccato esse ? Nam in nuptiis matrem objurgavit , dicens , *Quid mihi & tibi mulier ?* Item cum mater eum videre vellet : matrem & fratres eos appellavit , qui Dei voluntatem exequuntur. Præterea , cum beatus prædicaretur venter qui eum gestasset , & ubera quæ suxisset : ipse eos beatos appellavit , qui Dei voluntati obediunt. Quæ omnia putantur dicta esse ab eo in matris contumeliam , quod ejus matre nominata , & beata appellata ; alii contra matri suæ oppositi , dicti sunt ab eo beati. Jam vero cum sanctissima virgo ad tanti operis

ministerium sit electa, quâ sit ut indigna haberetur quam beatam appelleret? Hic Justinus sic respondet: illud, *Quid mihi & tibi mulier?* non dictum est ad objurgationem: sed veluti his verbis: Non is sum, qui vini quod consumitur in nuptiis, curam susceperim: & tamen si exoptas ne deficiat: jube, ministri id faciant quod dixerò, & senties vinum non defuturum. Quod certe accidit. Non itaque verbis objurgavit: qui re & factis matrem honoravit. In aliis, non ita locutus est Christus, quasi matrem privaret debito honore: sed docuit quo jure virgo beata debeat dici. Nam si, qui Dei audit atque exequitur sermonem, is Christi & frater, & soror & mater est: mater vero Christi habeat utrumque: perspicuum est, Mariam hoc potiore jure beatam debuisse prædicari: Et quia Deus non quamlibet elegit quæ mater fieret Christi, imò omnium fœminarum virtutibus excellentissimam: propterea

rea Christus volebat matrem suam prædicari ob eam virtutem, per quam id fuisset affecuta ut virgo fieret mater. Porro Christum nihil unquam fecisse in parentum contumaciam, aut ignominiam, testatur Lucas Evangelista, cum ait, Descendit cum Josepho & Maria Hierusalem, eratque iis obediens usque ad mortem: sic & Augustinus ea interpretatus, lib. de sancta virginitate, Jam Christus postquam cœpit ad populum agere, & ante omnia animadvertit Scribas & Phariseos errare in præcepto quo de agimus: atque id ipsum retorquere in parentes, hoc colore, quod, pro debita pietate, aliquid aliud exercerent, agerent quod æque pium & sanctum esse existimabant: *Quare* (inquit) *transgredimini mandata Dei ob traditionem vestram?* Dixit enim Dominus, *Honora patrem tuum & matrem tuam.* atque iterum: *Qui maledixerit patri vel matri, morte moriatur, Vos contra: Quicumque dixit patri aut*

*matri: Munus quod ex me est, proderit tibi, ne necesse ei sit amplius honorare patrem suum, aut matrem suam. Hypocrita, Deum colitis in vanum, qui præcepta hominum præceptis Domini antefertis. Cur hoc Christus tam severe? an quia Pharisæi his muneribus, ac thesauro sacro (quem Corban appellabant) perditæ abutebantur? oblationes quæ Templo destinabantur, sibi, atque adeo libidini applicabant, non Deo? minime. Notasset enim duntaxat luxuriam, & abusum. Sed reprehendit Sacerdotes, quod facta comparatione præceptorum: Sua, alioqui bona, Divinis anteferrent: & quod occasione pecuniæ quomodocumque sacra domestica, leges pietatis, & (quâ nulla est antiquior) obligationem naturalem violarent, contemnerent. Atqui hic aliquid etiam majus est. Nam primum præceptum quod obtendis, & quintum quod negligis: ambo sunt Divina: manant ab eodem auctore, atque Legislatore.*

*Ne-*



Necesse est igitur, ut vel ea mutuo se-  
se impediunt: & (contra quam ut legi-  
bus) quod posterius est, abrogetur per  
id quod antecedit: vel utrumque de-  
bet omnino conservari, tam quod ad  
Deum pertinet, quam quod ad paren-  
tes. Certe, præceptorum quædam  
sunt immobilia, videlicet (inquit Hil-  
debertus, epistolâ ultimâ) quæ lex æ-  
terna sanxit, & eâ observatâ, salu-  
tem conferunt: non observatâ, au-  
ferunt. Hujusmodi sunt (inquit ille  
Archiepiscopus Turonensis) *Diliges  
proximum tuum ex toto corde tuo, ex  
tota anima tua. Et, proximum, sicut  
te ipsum. Et, Honora patrem tuum &  
matrem tuam* & si qua sunt similia. A-  
lia, mobilia, quæ lex æterna non  
sanxit: sed posteriorum diligentia in-  
venit ratione utilitatis, non ad salu-  
tem principaliter obtinendam, sed  
ad eam tutius inveniendam. Hujus-  
modi sit, esse Jesuitam. Certe tua in  
me obligatio, est perpetua & immo-  
bilis. Sed quid si hîc audemus dicere,

D. 5

Deum.

Deum ipsum minus sollicitum fuisse cultus sui quam parentum? itaque è duobus suis illis præceptis, posterius quodammodo anteferri? Placebunt adhuc Pharisæi magis; quam Christus? Deus, non sine mysterio quodam, sua enunciavit simpliciter: nec poenâ, nec præmio imposito, si ea homines vel observarent, vel contemnerent; Parentum, cum hac clausula; **UT SIS LONGÆVUS SUPER TERRAM.** Nam etsi hinc liquido ostenditur, Naturam non pati posse ut is vivat longius super terram, qui eos à quibus vitam acceperit, negligit: utque ei bene ac beate sit uspiam, qui ideo vult latere ne in illos gratus & officiosus habeatur, qui cum tantâ cura ac molestia, quam sibi vitalem animam dedere, foverunt ac sustentarunt: eo tamen quod præcipue intendimus, apparet. Ait enim. se ferri ac duæi zelotypia, si quis honorat Deos falsos, & alienos. At si idem fecerit in parentes: tantum abest qui

qui invidet, ut id jubeat, præcipiat maxime: & cum eo præmio jubeat, quo nullum est humano generi jucundius. Cur ea omnia tam obnixe? Quia cum Dii illi venerantur quos laudat, quos admittit, quos justos, legitimosque habet: commissum illis, imputat sibi. contra, omissum negligentia; ne si is veneretur maxime, non excusat. Sed & ea ratio est fortasse, quod ( si ita loqui licet ) Deus Opt. Max. non tam morosus in cultu ac veneratione est, quam quilibet nostrum. Satis ille, ut vult, observatur, si pro sexu, ætate, & qualitate singulorum eum unusquisque observet. Non facit enim Ecclesiastica dignitas Christianum, inquit Hieronymus: Alius in Ecclesia est oculus, alius, lingua: alius, manus: pes, aurisve alius est. Qua quis in vacatione fit, si in ea, ut potest, serviat Deo: Deo fatis & abunde facit. A cunctis non exigit tantumdem. At in homine, secus est. Nisi ei filius ad

nutum pius atque officiosus sit : nisi ei pro arbitrio inserviat : contentus non est. Nec refert cujus conditionis sint utrique. pater etenim quisquis sit, eadem proportionē pater est : & filius quicumque, æquo jure est filius. Itaque ut parentes sine exceptione veneremur : ultro quod id debemus sponte : **HOC VOLO, HOC JUBEO** inquit Dominus : **ET PRO OPERE ISTO PRODUCO ANNOS, UT FIAT SEMPER.** Quid igitur ? Si Christus jūste ac merito redarguit Judaicos illos sacerdotes : potest tibi piū videri, patre ac filio Religionem unam profitentibus, filium se Collegio cuidam, Regulæ, aut Societati addicere, quæ, etsi licita & sancta est, est tamen hominum inventum : & hoc ipso patrē negligere & contemnere, quod Deus, quod Natura vetat ? Eo dempto quod Deo potissimum debetur, cujus modi adoratio, & invocatio est : quid præterea in Religione ipsa religiosius, diviniusque est, quam parentes honorare

rare ac colere? oblatio, res sacra est. hęc tamen ( ut videre est ) Christus postponit pietati, atque obedientię liberorum. Sanctum & religiosum est, vovere se Ecclesię, ministerio, & obsequio fratrum. Paulus nihilominus, epist. 1. ad Timotheum mandat, UT VIDUÆ, QUÆ FILIOS, AUT NEPOTES HABENT, DISCANT, PRIMUM DOMUM PROPRIAM REGERE: QUÆ PARENTES, VICEM MUTUAM REDDERE: VALE-RE ENIM ISTUD APUD DEUM. Certe, si quem illi ministerio eligi oportet: is, cave eligendus est, qui in operibus bonis habeat testimonium. Hęc vero sunt huiusmodi: SI FILIOS ( inquit ) EDUCAVIT: & quę sequuntur. An Paulus id pręscriberet tam accurate, nisi, eo etiam auctore, quędam essent officia privata & domestica, quę necesse est aliis omnibus anteponi, etiam sacris, etiam publicis? Nam revera hęc ab  
illis

illis proficisci. Sane ubi de moribus quæstio est, aut de naturalibus præceptis & institutis: Christiani non dissentiunt à Paganis. Qui præter naturam vivit, Dei mandata non servat, ut Nilus ipse ait, in institutione ad Monachos. Et, ut Athenagoras in apologia pro Christianis, Deus ad ea quæ præter naturam sunt, neminem movet. Itaque nihil dictum est à Paulo, quod non prius esset à Socrate, apud Xenophontem.: & quod non prius Athenienses legibus nominatim censuissent. Si quis inofficiosus fuerit in parentes (inquit ille, lib. 2. de factis & dictis Socratis) omnium magistratum sit incapax. Nam qui rite faciet sacra, qui juste Rempubl. administraverit, si impius domi est, si ingratus, atque propterea iniquus, injuriusque in suos? Quod ad leges Atheniensium: hæc sunt apud Æschinem in Timarchum, & apud Plutarchum in eodem. Quid Paulus? Is, quasi cum Socrate contenderet. SI

QUIS

QUIS SUORUM, ET MAXIME DOMESTICORUM, CURAM NON HABEAT (inquit) FIDEM NEGAVIT, ET EST INFIDELI DETERIOR. Nunc vide quæ sit de te opposita conjectura. Necessario (inquent) erit obedientissimus Generali, Provinciali, Presbyteris, quia patrem magnifice contempsit: quia hunc strenue abdicavit ut extraneum, ut publicanum. En (piæ fili) quam longe à via Domini divertisti, & quam à mandatis ejus alienus es? quæ tamen avis & proavis omnibus imo Christo, melius scire & callere existimas arroganter. NON EQUIDEM PATER ET MATER DEO COMPARANDI, SED CUM DEO DILIGENDI SUNT inquit Tertullianus adversus Gnosticos. Et lib. de pudicitia: DE LOCO, MODUM: DE ORDINE, STATUM: DE CONFINIO, MERITUM CUIUSQUE PRÆCEPTI COGNOSCES, (inquit.) ITAQUE QUI NON  
HO.

HONORAT PATREM SUUM  
ET MATREM SUAM, DETE-  
RIOR EST ADULTERO DETE-  
RIOR HOMICIDA, FURE AC  
LATRONE DETERIOR. Sed malo  
virtutes cum virtutibus, quam vitia  
cum vitiis comparare. Quid tam pium  
in Ecclesia, quam legata ad pias cau-  
sas? & tamen sic Augustinus: QUI-  
CUNQUE VULT EXHÆREDA-  
TO FILIO HÆREDEM FACERE.  
ECCLESIAM, QUÆRAT ALTE-  
RUM QUI SUSCIPIAT. PROFE-  
CTO AUGUSTINUM NON IN-  
VENIET: IMO, DEO PROPITIO,  
INVENIET MEMINEM. Et in epi-  
sto. 119. ad Ecclesiam, nonne eam re-  
prehendit, quod inconsulto marito-  
vovisset continentiam: & cum ei  
voto postea consensisset, quod contra  
illius voluntatem vestem Monachæ  
sumpsisset: & cum filium haberet,  
bona sua erogasset duobus pauperibus  
monachis? Quod non ita dicimus  
(inquit.) ut si quisquam scandalisatus  
fuerit.



fuert de bonis operibus nostris, ab eis desistendum putemus : sed quia, alia causa est alienarum, alia necessariorum in societate aliqua personarum: alia fidelis, alia infidelis, alia parentum erga filios, alia filiorum erga parentes. Scribe itaque ad eum satisfactionem, petens veniam (inquit Ecdiciæ) quia in eum peccasti, quod præter ejus consilium & voluntatem, de rebus tuis fecisti quod faciendum putasti: non ut te pœniteat tribuisse pauperibus: sed eum tui boni operis participem & moderatorem habere noluisse. Nonne etiam memorabile est de Aurelio Carthaginensi Episcopo, qui donationem, quam à patre orbo accepisset, restituit donatori cum ei liberi supervenissent? Nullo enim casu verisimile esse, sibi malle quemquam hæredem alienum, quam filium. En longe alia judicia de pietate & officio, quam quæ & Pharisei novi inculcant tibi: videlicet, neque sacrificium, neque votum, neque

que oblationem aliquam ei cultui anteferri quam liberis imperat Deus. Pergamus, videamusque, sumptis iterum exemplis à summo illo Deo & homine, an verum sit quod profite mini, ob Clericatum, aut Monachatum, omnem abjiciendam esse pietatem: frustra que ad ea munera capeffenda desiderari consensum, judiciumque patris. Christus, quos vocavit ad se Apostolos, an vocavit, qui, ut tu, essent adolescentes? Et, si ut eum sequerentur, omisere naviculas, retia, atque opificia omnia: an ob id deservere etiam parentes? an si eos quoque utrum sine venia? Imo vero, qui mariti erant, an propterea repudiavere uxores? liberos an propterea abdicarunt? Certe Jacobus ac Joannes cum discessere à patre, majores erant viginti quinque annis. Verum quo gnaviter discessisse viderentur: an Judæâ relictâ migravere in Italiam, in Lotharingiam, aut Hispaniam? An deinceps, quia Christiani, ora  
ab.

abhoruere patrum? abominanda eorum præsentia, allocutio, conversatio fuit? Plus fecissent quam Magister eorum ac Dominus, qui (ut diximus) à Maria & Josepho non divertit. Sed ut sit tibi manifestum, eos patria & laribus non prius excessisse, quam Christo passo, profecti sunt per universum mundum: & quod nihilominus domi, & cum parentibus versabantur, licet vocati ambularent cum Christo: scriptum est, Jesum venisse in domum Petri, & Andreæ: ubi cum vidisset focum eorum febricitantem, sic eam sanasse, ut statim & sibi & Apostolis ministrasset. Itaque adduci Christo, non erat divertere à suis, non à parentibus, non ab uxore, non à liberis & domesticis. Imo vero Jacobus & Joannes, quamcunque ætatem attingissent, ita Jesum sunt secuti, si Zebedæus annuisset. Nam quia tum cum eo erant cum una proficisci iussit: necesse est Zebedæum verbo, aut taciturnitate consensisse. Enimvero  
in

in toto genere isto vocationum , an putas omnes esse unius generis , sive quæ à Deo fiunt nominatim , sive quæ hîc in Ecclesia ? Deus corda hominum cognoscit , dirigit , immutat. Itaque non decipitur. At homines , eligendo conjiciunt : quare sæpissime aberrant. Falli , ac decipi nostrum est. Sola numina conscia veri. Quid igitur ? in his nostris vocationibus summa est adhibenda diligentia , summa cautio , summa conjectura. Nihil debet solemnium prætermitti : cujusmodi est præcipue quod dicimus , votum & arbitrium parentum. Si tibi locum eum adducerem , in quo sic Christus ad Apostolos : **SINITE PARVULOS VENIRE AD ME :** diceres illic agi de impuberibus. Revera enim est in Evangelio , quod pueruli isti offerebantur , non quod ultro ad Jesum venirent. Ideoque non pronunciat , **VENITE AD ME :** sed , **SINITE VENIRE.** Et Rursus , **NE PROHIBUERIS EOS :** Ut doceret vocationem im-

impuberum, sicut baptisma, pendere à traditione, ac sponfione patrum, tutorum & curatorum. Nam si eo amplius dictum est, NE VETATE ILLOS: non parentibus dictum est, sed Discipulis qui increpabant offerentes. Hæc certe igitur de impuberibus. Sed quæ supra adduximus, ætatem non distinguunt. Scriptum est omnibus, PARENTES COLE. Scio, cum filius pervenit ad 25. annum, rati- habitationem patris, imo dissimultionē, imo taciturnitatem (qualis Zebedæi) haberi pro consensu. Sed is cuicuiusmodi sit, debet intervenire: nec potes discedere à patre, aut matre tua, invitis illis. Quid? à parentibus? dico, à germanis & consanguineis (nam Paulus generaliter loquitur de familia) quin in Deum pecces, fiasque reus impij animi ac infidelis. Verum (ut opinor) adducitur tibi in contrarium, quod cum quidam de discipulis petiisset à Domino, ut prius quam eum sequeretur, permetteret ire, ac sepelire patrem:

trem: Jesus ait illi, SEQUERE ME, ET SINE MORTUOS SEPELIRE MORTUOS SUOS: atque inde sic disputant: Sepultura, res religiosa & sacra est, maxime si patri fiat. At Christus nihilominus vult magis vacari sibi, quam sepulturæ. Præterea: Laici pro mortuis habentur. Nam esse voluptatibus hujus seculi sic involutos, ut qui inde non possunt enatare; merito pro submersis & extinctis habeantur. Hinc, VIDUA VIVENS IN DELITIIS, MORTUA EST. Clerici contra proprie vivunt. Nam pars sunt & portiuncula Dei viventis. Itaque vere eum abstinere à mortuis, qui, ut sit Illec à Domini, hoc est (ut existimant) Jesuita, dimisit patrem suum, & matrem suam. Argute: sed solutio in promptu est. Non sequitur in primis, ut quicquid pronuntiatur de Christo, id statim aut Clericis, aut Regularibus omnibus necessario conveniat. Transmissa est doctrina, non omnimoda potestas, inquit Tertullianus

nus lib. de pudicitia. Et sane, aliud est, Christum amplecti: aliud, tot hodiernos monachos, etsi non different ab iis, de quibus Dorotheus olim. Deinde, defuncto patre illius discipuli, cessabat ea exacta reverentia, quam forte ille domino obtendebat. Certum erat, eum filium amplius non esse. Postremo jubebat Dominus, non ut sepultura penitus ommitteretur, sed ut procuraretur ab alio. A quocunque id fieret, *parentare* dicebatur: propterea quod qui ante nos decesserunt, hos omnes communi nomine aut patres, aut majores appellamus. Causa funeris publica est, inquit Papinianus. Unde & Justinianus, Novellâ 43. & 59. aperte indicat Constantinopoli sumptus funerum ex publico fieri consuevisse. Cur igitur ad discipulum retardasset, quod per extraneum poterat obire? Sed tamen magna inter eos differentia est, qui impie, aut qui sine fraude à liberis relinqui possunt. Proderit

derit ista explicatio adversus ea omnia argumenta quibus te profecto circumscripsere. Si mortui sunt parentes, hoc est, si Judæi sunt, si idololatræ, si pagani, si infideles: filius ex adverso, si Christianus est, si Catholicus: velitque pater hunc secum una sepelire, id est, imperare ei Idololatriam: *Dimittito hunc patrem, & sequere me* inquit Dominus: *hunc mortui mortuum sepeliant.* Sic illa accipiac intelligi oportet, vel ex Ambrosio, cum ait, Non revocatur ab officio patris filius: sed fidelis à perfidi communione secernitur: vel ex Augustino, lib. singulari observationum in Mathæum: & lib. 1. ad Marcellianum de baptismo puerorum. Poterisne igitur cuiquam persuadere, solos Iesuitas vitam amplissimam vivere? nos miserrimos Christianos, quia Laici, mortuis ac sepultis impuniti? Hieronymus ad Furiam longe aliter sentit. Vivit (inquit) quicumque credit in Christum. Et Tertullia-



tullianus, lib. de carne Christi, non propterea collocat Marcionem inter mortuos, quod non esset Monachus, aut Heremita: sed quia, cum hæreticus esset: non vere ac proprie erat Christianus. Atqui nos homunculi patres, fideles etiam sumus: filii Dei etiam appellamur, etiam domestici, etiam fratres, etiam cohæredes Christi, etiam consortes Spiritus sancti. Sancti sunt omnes quotquot cum vita rectam fidem habent. Licet signa non faciant, licet dæmones non ejiciant, sancti sunt, inquit Hieronymus, homiliâ 59. Quod si eadem prætenditis, imo, si majora: nostrum est quoque beneficium. Nam cuilibet Christiano si petatur: *Cujus religionis es?* edocti à vobis, respondemus omnes: *Avitæ, paternæve*. Nullum sanctius erat juramentum, quam cum [PER FIDEM PARENTUM] jurabatur, inquit Philo, sententia accepta ab antiquissimo Philosopho. Non est igitur cur nos tantopere despicias: aut

E

istud

istud tunc facito cum nihil morabimur præter sepulturam. Habebis eo casu, si non sensum, at verba Christi ad discipulum, cui dixit, sequere me, cujus patrem jam sciebat mortuum; inquit Ambr. ille hoc loco. At te præcipue fefellere (ut opinor) hæc apud Mathæum : *Qui amat patrem aut matrem plusquam me, non est me dignus.* Ac rursus in Luca : *Si quis venit ad me, & non odit patrem suum, & matrem, & uxorem, & filios, & fratres, & sorores, imo & animam suam : non potest discipulus meus esse :* & alia hujusmodi, quæ sunt equidem magna & terribilia. Sed cum necesse sit ea etiam valere quæ attulimus in contrarium : debuisti inferre, ne Deus sibi ipse contrarius esset, posteriora hæc requirere explanationem. Quod patrem & liberos necesse sit odisse, ut Christi quis discipulus fiat : cedo, quæ doctrina ista, quæ religio esse diceretur, si verbis inhæreremus, non menti? Si, qui patrem odio prosequeretur,

queretur, bonus propterea esset discipulus: certe qui verberaret, dignus esset Patriarchatu: qui occideret, cathedrâ Apostolicâ. Vide quot monstra, quot flagitia nascerentur ex verbis, non male conceptis? sed acceptis Sic Chrysostomus, homiliâ 36. in Mathæum: Non simpliciter iussit te conjunctos tibi homines insequi. Id enim iniquum esset, atque pestiferum. Sed quanto plus me petit aliquis diligere, odio ipsum habeas, inquit. Fateor igitur magis debere amari Deum, quam parentes. Id est quod dicitur à Salomone, [*Ordinate in me caritatem,*] inquit Origines: quod ab Ambrosio, in Lucam: Si officium parentibus exhibendum est: quanto magis auctori parentum cui gratiam etiam pro parentibus tuis debes? Sed nego propterea sequi: Ergo beatius est Franciscanum esse, aut Jesuitam, quam patrem diligere & colere. Religio enim Christiana præcipue in fide consistit: in illo, aut illo ordine non con-

sistit. Quinimo hos ordines multæ Synodi non approbarunt. Et quamvis professio Ecclesiastica sit Laicali perfectior: non ideo etiam sequitur, filio, ne non sit potius Presbyter, quam Laicus, non cavendam esse eo casu contumaciam, inobedientiam, impietatem in parentes. Deus nec tibi, nec mihi præcepit ut simus Sacerdotes. Ut me honores, tibi præcipit omnino. Me violasti sciens? contraxisti crimen, maledictionem, anathema: Sed esse Jesuitam, res est indifferens. Potes esse Christianus, & viam Christi, hoc est, viam vitæ ingredi: nec tamen esse Jesuita. Non est igitur prætermittendum quod est necessitatis, ut fiat quod est voluntatis. Nam & sic D. Thomas sapienter: Quæso, si ex duabus Christum insequendi viis, una esset tam plana, ut facile cum eo me amares: altera, tam petrosa, ut nisi me proculdubio odisses, tibi impossibile esset hunc amare: qua potissimum insisteres? Sed (ô fili) Matthæus

thæus ac Lucas nimis dilucide scripserunt, quam ut ex literulâ aliquâ impingeres in labyrinthum, atque inextricabiles ambages. Lege hos Evangelistas, & lege à capite ad calcem. Invenies efferri, quod si agitur de obeundo martyrio pro Christo (quod vocant *Bajulare crucem*, & *venire post se*, atque hæc duo sint in trutina, & in pendenti, *Deum negare coram hominibus* (aut,) *patrem colere & amare*. Satiùs sit profecto hunc odisse, imò & se, & animam suam, quam subvereri de Christo. Si ergo tibi voluisssem persuadere, ut abjureres baptismum quod iniisti meis auspiciis, & in quo potui tibi esse Episcopus: si ut projiceres eam preciosissimam margaritâ, quam Joannes Apostolus ei dederat qui Deum lupum ostendisset, cui singulis annis 12. pueri sacrificabantur: aut si tibi voluisssem persuadere, ut spreto Christianismo: placeret tibi Mahometes, placerent *æthiopiæ*, placerent hæreses (ne dicas cum

Salviano, nos existimare tempus aliquod esse, quo Deo aliquid debeat præferri) posses auctoritate illius scripturæ, mihi his casibus detrectare obedientiam, & honorem. Posses Victoriæ matronam (de quibus victor Episcopus lib. 1. de persec. Vandalica) qui maluerunt distrahi à filiis, separari à conjugibus, auferri sibi substantiam, quam eorum persuasione effici Arrianos. Posses eo casu sine patre & matre esse, ut Melchisedech, qui propterea dictus est carere utroque, quod pius genitus esset ex impiis & injustis, Chananæis videlicet. Paganis, patria nimis chara, & totus affectus est in parentes. Nos (inquit Pontius Diaconus Cypriani) & parentes ipsos, si contra Deum suaserint, abhorremus. Sed, nobis ambo Christianis & Catholicis, quis præ me in te debuit quicquam? Quem odisse jus est, quem spernere, quem violare: cui istud Leviticum opponi, *Ignoro nescio vos*: is est qui te adscriberet Diis alienis,

aut

aut qui vitulo conflativi devoveret ,  
juxta illud Mosis , *Sit manus tua super  
eos , & effunde sanguinem ipsorum ,  
qui te volunt à veritate depravare.*  
Quo loco tamen annotabis , & ex  
cap. 32. Exodi: quod Moses, licet illo  
casu approbaverit parricidium: id  
explicavit in uxore, in filio, in patre;  
in sorore, in propinquo & amico: de  
patre, ne verbum quidem. Ita ejus  
sancta appellatio est, ita veneranda,  
ita inviolabilis: in patrem nihil jure  
licet. Lege epistolam Mosis, Maxi-  
mi, Nicostрати, Rufini, & aliorum  
confessorum (quæ est 77.) ad Cypria-  
num: invenies verba illa Christi sic  
accipi, sed & Chrysostomum, qui,  
homiliâ 65. in Mathæum, ubi ea  
interpretatur, sic scribere: mihi au-  
tem persecutiones hîc occultius sig-  
nificare videtur. Multi enim à paren-  
tibus filij, multi mariti ab uxoribus ad  
impietatem trahebantur: quæ cum  
facere conabuntur, ait, nec uxoris  
loco, nec parentis habeantur. Et qui

scripsit in eundem, homilia 27. Non est credibile (inquit) ut Deus jubeat corporaliter relinquere patrem, qui dixit, *Honora patrem tuum & matrem tuam*. Si ergo habes patrem infidelem, obsequere ei: & tu invenies mercedem pietatis: & ipse infidelitatis suæ habebit damnationem suam. Et ideo non dixit, *Qui diligit patrem, non est me dignus*. Sed, *Qui diligit patrem aut matrem suam plusquam me, non est me dignus*. Sicut enim post Deum diligere parentes, pietas est: sic, plus quam Deum, impietas. Si ergo (iterum ait) habes patrem infidelem, obsequere ei. Si autem voluerit te in eandem foveam infidelitatis immergere, in qua ipse est: plus dilige Deum, quam patrem, quia pater non est animæ, sed carnis. Utcunque tamen, non jubet corporaliter filium hoc casu separari à patre, sed fide duntaxat. Lege quomodo eadem verba quæ sunt in lege, *Qui dixerit patri aut matri, non novimus vos: isti custodierunt*



*dierunt mandatum meum, ait Dominus: quomodo ( inquit Philostratus, Episcopus Brixienſis ( qui fuit ante Auguſtinum ) interpretetur, lib. de hæreſibus: Non genituram parentum audiendam utique: ſed impietatem eorum paganam ſpernendam, atque damnandam eſſe, modis omnibus collaudabat, inquit. Sic & Salonius, Episcopus Viennensis, in Ecclesiaſtem: pro Chriſti profeſſione ( inquit ) contemnere ſimul, & odiſſe debemus patrem & matrem, omneſque propinquos, ſi nobis in via Domini fuerint contrarii, ſicut ſancti Martyres ſæpe fuiſſe leguntur. Unde ipſe Auguſtinus in ſermonibus: videntur his verbis Domini ( inquit ) exhortata martyria, denique Jeſus ipſe moriens ( inquit ) Arnoldus Abbas, ) ut per omnia pietatis ſœdera commendaret antiquum decretum quod de honorandis parentibus dictaverit: obſervavit, dicens Joanni, *Mulier, ecce filius tuus: & ad diſcipulũ: [ Ecce mater tua. ]**

Cæterum, quod Joannes sic senserit, ut supra narrat Prochirus, cap. 21. Cum baptisasset Chrysippam in Pathmo insula: & propterea a marito infideli vellet discedere: Joannem dixisse, Nequaquam id tibi permissum est, inquit. Nam neque jussit, neque misit me Deus separare uxorem à viro suo, neque virum ab uxore. Revertere itaque cum pace in domum tuam. Si licet divertere à marito; non expedit, inquit Augustinus, lib. de adulterinis conjugiiis, ad Pollentium. Quod si hodie martyria non sunt: Gregorius Magnus, homilia 37. de diversis Evangelii lectionibus, interpretatur hunc locum de carnalibus desideriis. Tunc etenim (inquit) bene nostram animam odimus, cum ejus carnalibus desideriis non acquiescimus, ejus appetitum frangimus, ejus voluptatibus reluctamur. Atqui (ut ea de re postea) tibi (ô fili) Jesuitæ identidem insusurrant. Satiùs est calcari, conterive patrem, quam cucullum amisisse.

Cædo

Cædo imprimis an Joannes ille Chrysostomus ignorabat quo sensu essent accipienda quæ ex Luca & Matthæo adducta sunt (hîc convertimur ad Ecclesiam) cum lib. primo de Sacerdotio, narrat de se ipso (narrat & Leo imperator, in oratione encomiastica, de eodem) post peracta studia Athenis, revertisse Antiochiam, atque ibi crebris admonitionibus Basilii Magni (neque enim Simeon Metaphrastes existimat hunc esse, qui magnus cognominatus est) vitam monasticam concupisse, Obstitisse diu, non ætatem immaturam (nam major erat viginti quinque annis, & jam foro operam dabat) non patrem (nam excesserat è vivis) non frequentes socios & amicos (nam Basiliius erat ei vicē omniū) quid igitur? unam materculam. Nam ubi ea ad me his verbis: Florebam etiamnum pulchritudine, & annis, cum fastidiere secunda vota, ut tibi infan- tulo magis ac magis sufficerem, atque ut instituendo & promovendo, tibi

largiora essent omnia. Nunc pro ea gratiarum actione, & pro eo solatio quod tot beneficia expostulant: me deferere in animo est, me spernere, & despiceret me injicere in secundam viduitatem? exsuscitare luctum jam sopitum? An te aliqua defui, aut nocui tibi? si vis monachari, cur id ante maternos cineres? ubi apud te vox Domini clamantis, *Fili, colito Anthusam*? Pulchre Deo obtemperat, qui tristis est parenti. Etsi mihi omnia præstiteris, non reddidisti dolores, non cruciatus, quos pro te passa sum: non reddidisti obsequia quibus te gestavi: non reddidisti alimenta quæ tribui, vero pietatis affectu immulgens labris tuis ubera: non reddidisti famem, quam pro te toleravi, ne quid quod tibi noxium esset ederem, ne quid quod lacti noceret, hauritem. Tibi jejunavi, tibi manducavi, tibi quem volui cibum non accepi, tibi quem nolui cibum sumpsi: tibi vigilaui, tibi fleui, & tu me deferis? *Cessi*  
in-

(inquit) *viſtus reverentiâ in matrem*,  
Itaque Baſilio ſe excuſat, & nihil im-  
pedientibus illis capitulis quæ tibi ob-  
jiciunt importune: maluit adhærere  
matri, quam Monafterio. Is ipſe  
ſcribens ad Baſilium, ſic loquitur:  
Promiſſis non ſteti, fateor, quippe jam  
indè ab Athenis, illiusque loci amici-  
tiâ & amicorum connexione, factu-  
rum me receperam, ut tecum vitæ  
conſuetudinem haberem, ſimulque  
philopharer. Eidem autem ſefelli,  
haud ſponte ac libenter, verum quod  
lex legem ſuperarit: ea nimirum quæ  
parentes jubet colere ſodalitatis ac  
familiaritatis legem. Conferas te  
nunc cum Chryſoſtomo. Vix ado-  
leſcens cogitaſti de Ieſuiſmo: nec pa-  
tre carebas tuo (niſi eo carere eſt, qui  
charus non ſit) nec matre etiâ hu-  
maniffima: Quid igitur? Ne vel au-  
ctoritas illius, vel caritas, pietasque  
hujus te dimoveret, quo quicquam in  
ea te auderes ſine licentia utriusque,  
ſine eorum bona gratia, ac conſilio:  
vitaſti

vitasti naturalem aspectum : migrasti,  
 atque per triennium jam te subduxisti  
 eâ indignitate & arrogantia, ut eo to-  
 to intervallo nec scripseris, nec nun-  
 ciaveris quicquam quo saltem intelli-  
 geremus ubi esses : in Galliane hac  
 miserrima, an in Lotharingia, aut  
 Hispania. Verebaris (opinor) ne quam  
 Hortensiam appellabas, ea hoc modo  
 te compellaret : Patri (quod abomi-  
 nor) si quid humanitus accideret : qua-  
 le mihi subsidium esset à fraterculis ?  
 ætas enim non suppetit. Præterea quâ  
 fiducia, cum exemplum habeant  
 tuum ? O, quam Deum Opt. Maxim.  
 devinxisti, qui ut ei præcipue inservi-  
 res ita ab omni jure & officio desci-  
 visti, ita à recto & honesto, ut nihil  
 volueris amplius tibi commune esse  
 cum parentibus, imo ne officium qui-  
 dem epistolarum. Si hoc propterea  
 sane quia attentiores sunt sanguini :  
 attramen sunt fideles. Si quia plus su-  
 perstitiosi, quam conveniat Christia-  
 nis, metu tui accidit, non Christi.  
 Me-

Merito certe recusabāt illa bona Veturia legari ad Martium. Quid enim (ajebat) obtinebo, quid Valeria, quid nepotes, cum par quadriennium, quo ejectus est, nullā literulā nos conveni- rit? tam sit familiæ oblitus, quam ci- vitatis, à qua damnatus est indigne ac injuste? Legationem tamen obiit, vicitque (ut diximus) solo nomine obstinationem filii. Utrum religiosior es Chrysostomo, aut Coriolano sub- durior? hic matri obviam venit: tu contra à tua abstines, neque aliud quicquam tantopere evitas. Cur sal- tem non rescribis sine die & Consule? Profecto si ista ageres, Basilio auctore, fortasse esset; ob tantum virum, quo- piam obumbrares impietatem. Sed vereor à tantis Patribus quicquam habeamus huc usque præter longum & inane nomen. Melius est igitur si veteribus exemplis tecum iterum a- gamus. Quod Chrysostomus ipse li- bros scripsit *adversus vituperatores vi- ta monastica*, in quibus patres exhor- tatur,

tatur, ut curent filios huic philosophiæ potius erudiri, quam eloquentiæ, aut militiæ: facit quidem profecto, ut vitam hanc alteri præponat: consulatque parentibus, filios suos magis huic vitæ dedere, quam sæculo. Non autem ut auctor sit filiis, parentibus non obedire, utque iis invitatis relinquunt civitates: montes: heremosque habitent. Quinimo jubet ut post certum tempus Christiane conditi, redeant in paternam domum. Unde apparet, Monachos tunc perpetuos non fuisse, neque in continuo voto, ut nunc sunt. Præterea, vide eundem Chrysostomum, in libris de providentiâ: ibi animadvertes, quantum sit in consolando Stagirium monachum, qui propterea à dæmone vexabatur, quod adversus consilium patris se dedisset vitæ monasticæ, & quem ideo monachum obreptitium appellat. Atqui Stagirius erat major natu: neque parens prohibuerat hoc vitæ genus. Dederat solummodo con-

filium



filium in contrarium. Ipse Augustinus, ipse Ambrosius, lib. 1. de virginibus ad finem, certe quidem ostendit, parentes non debere impedire ne filia se voveat Ecclesiæ: sed quod ad patrem attinet, posse eum, si velit, huic rei afferre impedimentum. Et Augustinus, in illa epistola 109. 110. ad Ecdiciam, nonne aperte ait, factam ab eo donationem in necem filii, propterea esse inconsultam, quod pater ignoraret quid filius, cum cœpisset esse grandiusculæ ætatis, sectaturus esset, utrum monachi professionem, an Ecclesiasticum ministerium, an conjugalis necessitudinis vinculum? Itaque dum ad eam ætatem perveniret, necessariam fuisse oblationem patris. Certe sic concludit epistolam: Filium autem vestrum, quoniam de legitimis eum & honestis nuptiis suscepisti magis in patris quam in tua esse potestate quis nesciat? Ideoque ei negari non potest ubicunque illum esse cognoverit, & jure poposcit

cerit. Idem, epistolâ 233. ad Benenatum: nonne de puella, quam aiebant velle esse Sanctimonialem, sic scribit: se de ea re cum Felice viro ejus materteræ consuluisse, neque enim se aliter potuisse, vel debuisse. De matre, quid fecisset, cujus voluntatem (inquit) in tradenda filia, Natura omnibus præponit? Certe si tantum jus tribuit matri, quid patri tribuisset? ne quidem ætatis rationem habuisset. Postremo, te appello, ô Salviane! An infcius eras novæ istius Ecclesiasticæ disciplinæ, cum nihil agebas tam obnixæ, quam ut Hepatius & Quiëta factum excusarent Palladiæ tuæ, que iis inconsultis amplexa erat Christianismum? imo tuum præcipue, qui post susceptam Auspiciolam, quamquam orationis ac continentiæ causâ, attamen sine soceri auctoritate discesseras à thoro? Cum tibi Palladium spondebant, sciebant collocari Christiano. Quapropter satis consensisse videbantur, ut in Fide marito ea vicissim

cissim conveniret. Imo & certum erat, quod paulo post divinum hoc vestrum matrimonium, tui illi uxor ii parentes sese similiter adscripserant Christo. Utcumque igitur merito moleste ferrent quod iis inconsultis egisses, suscepisses hæc omnia (nam tali divortio intercedente, quæ spes masculi deinceps? & in tanto negotio desiderari iudicium parentum, quæ contumelia ac despicientia est?) si vetabant ne in conspectû propterea venires, & si per septem annos utcunque eis creberrime scriberes, nihil tibi quicquam respondebant (omitto quod nupta non tam deinde ad patrem, quam ad maritum pertinet) num poteras illis audacter objicere, sic Deum apprime diligi, si odio habeas patrem? At contra, lege illius epistolas. Quicquid ibi offenderis, sunt lacrymæ, sunt deprecationes, sunt veniæ expetitæ: *etsi* (inquit) *delictum nescio*. Tu quid? cessatio scribendi, tua est, non mea. Et qui vix excesseras ex ephebis, *vo-*  
*ves,*

ves, me inconsulto, coelibatum, non castitatem. Nam quiei sufficias hac ætate? Nulla tacita voluntas excusat tuam arrogantiam. Nam contra intercesseram nominatim. Denique, quod defecisti ad Jesuitas, non a Paganismo defecisti: sed a communi Christianorum. Cur igitur, potius quam Salvianus, veniam non imploras? *quia*, non ut ille, *delictum nostri*. Quæso, considera quam deliquisse se existimasset Salvianus, si eos parentes violasset in quibus nihil erat amplius Idolorum: cum in eos qui adhuc pagani essent: & in parentes, non natura, sed affinitate: sic doleat commisisse quod dolerent? cum existimaret se Christianum vere non videri, quod focerum, focrumque haud ita honorasset, ut jubet dominus patrem, hoc est, sine distinctione, probus improbus sit: Judæusque, an Paganus: fidelis, aut infidelis? Legerat apud Aristæum, cum Rex Ptolomæus unum ex 72. interpretibus interrogasset, qui-

quibusnam modis genitoribus dignas  
referat gratias, respondisse, si nulla  
re illos tristitia affeceris. Legerat ul-  
timum judicium, quo narratur a Sy-  
billa, inter condemnatos eos recita-  
ri.

— Quive parentes

In senio linqunt, neque præmia digna re-  
pendunt.

Pro nutritu: vel qui parere recusant.

Aspera vel contra dixerunt verba parentes.

Certe Faustus, Episcopus, lib. 1. de li-  
bero arbitrio, cap. 12. cum interpreta-  
tur ea verba: *Epulari & gaudere o-  
porteret, quia hic filius meus mortuus  
fuerat, & revixit: perierat, & in-  
ventus est*: perditionem illam inter-  
pretatur, quod discessisset a patre.  
Non in natura ejus fuerat (inquit) fa-  
cta perditio, sed qui recedendo, con-  
temptu mortuus fuerat, revixit, desi-  
derio revertendi. Nam sicut sui cri-  
minis est, quod longe pii parentis re-  
fugit oculos: ita suæ est devotionis,  
quod per insitum sibi bonum, delibe-  
rans & adsurgens, ad paternos re-  
currit

currit amplexus. Ennim vero tempus est, ut ab exemplis tranſeamus ad constitutiones Eccleſiæ: ne forte ob-  
 jicias, quæ adduximus, eſſe ſingu-  
 lorum. itaque in theſim nod valere.  
 Nam etſi ingenue fateor, poſſe a fi-  
 lio relinqui patrem Idololatram, ſi  
 vi eum truderet in Paganismum (ut eſt  
 apud Theodoritum lib. 3. hiſtoriæ Ec-  
 cleſiaſticae, cap. 14. & 22. & apud  
 Chryſoſtomum, lib. illo ii. adverſus  
 vituperatores vitæ monaſticae) vi defi-  
 ciente, affero tibi cum Generales, tum  
 Provinciales Synodos, quibus neque  
 filio patrem, neque patri filium: non  
 maritum uxori, non ſervo dominum  
 fas eſt deſerere hoc ſolo, quod in Re-  
 ligione diſſentiant, aut quod præpo-  
 nant aliquid pietati: quibuſve nec cu-  
 cullo, nec pallio, nec cingulo extingui-  
 tur ea arctiſſima obligatio quam ſta-  
 tim à Natura Dii omnis, homineſque  
 pepigere invicem. Mos eſt barbaro-  
 rum, mos hæreticorum (inquit Vîctor  
 Epîſcopus lib. 1. de perſecutione Van-  
 dalica)

dalica) maritos ab uxoribus, liberos à parentibus separare, Ecclesiâ vero beneficio Valentiniani, Carthagini restitutâ Catholicis: continuo Episcopus statuit, ut fœdera conjugalia manerent, & pignora genitoribus redderentur, quos Arriam distraxerant. Ergo incipiat à servo narratio. Is si voluisset deficere à domino, propterea quod Gentilis, Judæusque esset: an non fauor libertatis, atque religionis potissimum, hunc excusasset? Negat Canon Apostolorum: *Servi* (ita enim scriptum est, cap. 81.) *si in Clerum promoveantur citra dominorum voluntatem: hoc ipsum operatur redhibitionem.* Si quando vero servus gradus ordinatione dignus videatur qualis & noster Onesimus apparuit: & domini consenserint, manumque miserint, & domo sua ablegaverint: efficitur. Negat Concilium Gangrense, quod anno 324. fuit, paulo post Nycœnum. *Si quis servum alienum* (inquit) *occasione Religionis, dominum suum*

*suum contemnere, & ejus ministerium destituere : ac non potius docuerit eum suo domino bona fide, ac cum honorificentia deservire ( ut libertus sit Christi, inquit Ignatius ) anathema sit. Certum est, agi illic de servis Gentilium. Et cum Religio nominatur, intelligi Christianam. Sed & Concilio Aurelianensi V. sub Childeberto, plus continetur. Nam ultra quod secundum canonem prohibet servo se vovere Ecclesiæ in scio domino : poenam quoque imponit Episcopo, videlicet, ut sex menses abstinēat à Missa, si servum sine voluntate domini ordina-verit. Certe quidem Justinianus, constitutione 123. domino statuerat tempus intra quod servum reposceret ab Ecclesia. At Leo 9 ut antea, voluit esse perpetuum. Sin putas aliud esse in Monachatu : eum enim sacerdotio anteferri : Carolus Magnus aliter & sensit & constituit. Ut servum alterius nemo ( inquit cap 20. & 72. ) sollicitet ad Clericatum, aut Monachicum ordinem*



ordinem promovere, sine voluntate ac  
licentia domini sui. Id vetus observa-  
bat Ecclesia, non quia turpe esse exi-  
stimaret, Deo dominorum servire  
servum nam par omnium conditio  
est apud Deum. Cur igitur? Audi  
Tertullianum contra Marcionem?  
*Quid enim (inquit) injustius, quid ini-  
quius & improbius, quam servo alieno  
ita benefacere, ut domino eripiatur, ut  
alii vendicetur, ut adversus caput do-  
mini subornetur: &, quidem, quod  
indignius est, in ipsa adhuc domo domini,  
de ipsius adhuc horreis vivens, & sub  
ipsius adhuc plagis tremens?* Adversus  
uxorem alienam, servum, libertum,  
subditumve alterius, æque benefi-  
cio, atque injuria est abstinendum.  
Nullo enim modo hos quis pelliceat  
sibi, quin, quod peculiare est ma-  
rito quod domino, quod patro-  
no, quod principi iniquissime au-  
ferat fidem & amicitiam. Porro,  
quicumque est alieni juris: obediendo,  
vitam æternam consequitur:

calcitrando, divertit à Religione Christiana, quæ tota est in caritate & obedientia: nisi quid ei impium præcise imperarent, ut & homilia 35. Joannes Chrysostomus scribit, cum Pauli illa enarrat verba FILII, IN OMNIBUS OBEDITE. De uxore ita etiam Apostoli, cap. V. *Episcopis, aut Presbyter, aut Diaconus uxorem suam prætenu religionis non abjicit. Si abjicit: segregator à communione: si perseverent, deponitor.* Idem canon in jure Pontificio transcriptus est hoc modo, dist. 28. *Si quis docuerit Sacerdotem, sub obtentu Religionis propriam uxorem contemnere, sit anathema.* Et patres in Gangrensi illo Concilio: *Si quis discernit Presbyterum conjugatum, tanquam occasione nuptiarum quod offerre non debeat, & ab ejus oblatione ideo abstinet: anathema sit.* Et postea: *Si quis nuptias in accusationem induxerit, & mulierem fidelem ac religiosam cum viro suo dormientem, abominandam crediderit, aut etiam accusandam, tanquam non posse*  
con-

*conjugatos in Regnum Dei ingredi :  
anathema sit. Quid ais? an non statui  
his legibus, tam esse extra Ecclesiam  
quæ prætextu continentiae se segregat  
à marito, & thalamo abstinet, quam  
quilandant hujusmodi castitates, &  
se abstinentes vocitando, Societatem  
tam divinam vilipendunt, ac deprimunt?  
Quod ad patres ac liberos at-  
tinet, mutuae eorum obligatio est. Ita-  
que in parentes hæc ea Synodus im-  
primis: Si quis reliquerit proprios filios,  
& non eos aluerit: &, quod pietatis est,  
necessaria non præbuerit, sed sub obten-  
tu continentiae negligendos putaverit:  
anathema sit. Non commisi erga te  
quod à Patribus hîc improbatur: nec  
quæ omnium maxima negligentia vo-  
catur à Ptolomæo. Alui, extuli, in-  
stitui: &, si quicquam est in Græcis,  
Latinisque quo quis erudiri ingenue  
possit: quæ liberum scire æquum est  
adolefcentem: præ summa in te bene-  
volentia ac pietate, mutua mihi cum  
Jano Ærodiô, Præsidi, patruo tuo,*

Concertatio fuit, ne quid tibi deficeret ad eam rem tam præclaram: ut cui vitæ, conditioni te nacti essemus aptiorem, huic (ex vetere more Atheniensium, ut Eudoxio Rhetori scribit Nazianzenus) dederêre nostro arbitrio: aut tuo tandem, si, major factus, nos humanitus amisisses. Hujus beneficii ergo deseruisti etiam insalutatos. Est quidem certe in epistolis Hieronymi, Paulam & urbem, & liberos reliquisse, excepta Eustochia, quam Bethleem deduxit quo proficiscebatur, ut solitarie viveret. Sed erant omnes majores natu, præter Toxotium: cui, & puberi Rufinæ legavit sua omnia, ac tutores dedit. Et apud Paulinum, epistola 10. ad Severum, laudatur Melania, quæ vidua, & mater unius filioli, eo relicto navigavit Hierosolymam, atque ibi vitæ perfectiori se dedit. At eum ditissimum reliquit, atque omnium principum Romanorum consanguineum. Verum, quod ad te attinet, audi  
nunc

nunc quæ tua damnatio sit futura: & cogita à quo absolutionem impetrabis sententiæ tanti anathematis, cui te procul dubio subjicit eadem illa Synodus quam diximus: *Si qui filii* (inquit canon 16.) *parentes, maxime fideles deseruerint, occasione Dei cultus hoc justum esse judicantes: nec potius debitum honorem parentibus reddiderint, ut hoc ipsum in iis veneretur quod fideles sunt: anathema sit.* Obsecro: num celavêre tibi hoc Concilium? Credo equidem. Nunquam esse ita depravato animo, ut filius, tuâ sententia, plus posset adversus patrem, quam servus adversus dominum, utque tibi videretur acerbissimum esse parenti crimen, *Non consulere liberis: iis contra, leve & contemnendum, Si iniqui essent in parentem, inofficiosi, injuriosi & contumaces* Ecce, non distinguitur in hac Synodo, patres fideles, an infideles: liberi, puberes, an impuberes. Sed fortasse tibi insusurrant, Concilium illud, fuisse temporale,

valuisse sua die: hodiernâ non valere. Huic solutioni ita respondeo: Patris longo intervallo approbarunt eam Synodum: videlicet, in V Generali Constantinopolitana. Deinde & Gratianus ipse. Nam cur eam transcripsisset in Collectaneis? postremo illa interpretatio ferri posset, si Gangrensi Concilio prohibebatur receduntaxat à parentibus qui pagani essent. Nam quia religio Gentilium tunc adhuc potentior erat: itaque procul dubio cavendum ne Christianam nimis fastidirent: fortasse eo tempore Ecclesia improbasset à fidei deseri infidelem, nisi aperte traheretur in cultum & sacrificium Idolorum. Sed liquido apparet, Synodum noluisse eo magis deseriri parentes, si Christiani, fidelesque essent, cum ait *ut liberi hoc ipsum in iis venerentur quod fideles sunt*: Ratio perpetua Christianis. Nam & nostro tempore Vigoreus, ad id quod dicimus, citat hanc Synodum. Verum operæ pretium est  
me.

meminisse eo amplius causam & occasionem Synodi. Non fuit, quod Pagani quererentur se deferi ac negligi à liberis Christianis. Fuit ex adverso, quod Christianos Christiani relinquerent: atque id ipsum filii in eos committerent, quod tu nuper adversum me: uno excepto, quod illi veteres veram vitam Monasticam ambiebant; tu qualis ex nunc est, vestariam & verbosam. Quod illi veteres & mundum homini crucifigerent, & hominem mundo: Vos mundum duntaxat. Unde igitur illa vitiosa disciplina; Cum primum fuere in Ecclesia qui se dicerent Anachoretas, Eremitas aut Monachos: Eustatius extitit, qui zelo quodam, sed imprudenti, cepit personare verba illa speciosa, *Christo indignos esse, qui eo patrem aut matrem plus amarent*: atque inferre ex illis, omnia esse contemnenda, Lares, facultates, parentes, liberos, germanos, denique hunc mundum universum, quo beatius in solitudine

liceret esse, degereque sub norma aliquâ, aut societate sejuncta ab aliis: Videlicet, ne jam sufficeret esse Christianum, nisi Eustatienus esset præterea. Quid manabat de doctrina ista? ut uxor relinqueret maritum: dominum, servus: parentes suos liberi, & viceversa: ut Christiani facerent matrimonium: universum id denique ad quod pro patria nati sumus: ut Religio, quod potest maxime, nempe continere omnes in officio: eos, in contrarium dissiparet, perverteret: denique ut merito dicerent Gentiles (inter hos Zozimus) *Christianos infructuosos esse in negotio*: quæ summa erat hominibus injuria, inquit Tertullianus in Apologetico. Respondebant nihilominus Eustathieni: relictionem, neglectumque hunc fieri occasione *Deicultus*. At patres in Concilio damnavere occasionem istam: edixereque universi, magis Christianum, religiosumque esse, parentes venerari & colere (præcipi etenim à  
Do-



Domino ) quam , ut is vicissim observetur , eos negligi : quod prohibet. Nam cum parentibus recte eum coli posse : sine iis , infideliter , inquit Joannes ille. Ergo Eustachius diver- tit ab instituto : & tandem Episcopus fuit in Ecclesia , non Monachus. Quod Concilii illius occasio fuerit hujusmodi , docet epistola Synodi- ca , docent Socrates , Sozomenus , Isidorus : sed & Gratianus ipse distinct. 16. & 30. Quid ? tot & tantæ auctoritates tibi non sufficiunt , post quam mea apud te jam nulla est ? An iterum , iterumque putas , te , nec si permisero , posse evadere in verum , legitimumque Jesuitam ? Fortasse in hoc luto adhuc etiam hæres. Videamus itaque quid sit id quod tibi afferunt ex D. Hieronymo : & an Claustrina aliqua Theologia supervenit , novumve Evangelium , quo abrogata sint vetera illa Ecclesiæ decreta , postquam hæc tam magnifice contemnis. Certe D. Hieronymus scribens ad

Heliodorum de laude vitæ solitariae, usus est his verbis: *Licet parvulus ex collo pendeat nepos: licet sparsa crine, & scissis vestibus, verba quibus te mater nutriverat ostendat: licet in limine pater jaceat: per calcatum perge patrem: fidei oculis ad vexillum crucis evola: Solum pietatis genis est, in hac re esse crudelem.* Sententia omnino magna, & eximii in Ecclesia Theologi. Sed prius quam dilucide ostendo, quo sensu enunciata est: Cum Hieronymus (ut videtur) sic capite diminuat parentes, & Naturam ipsam eo quasi constituat modo: concilia mihi imprimis quod pro parentibus scripserat, in epistola de vitando suspecto contubernio: *Pater & mater*, nomina (inquit) sunt pietatis, officiorum vocabula, vincula Naturæ, secundaque post Deum foederatio. *Non est laus si vos diligitis: scelus est si odistis. Dominus noster Iesus Christus subiectus erat parentibus suis. Venerabatur matrem, cujus ipse erat pater: colebat nutritium,*  
*quem*

*quem nutritiverat: gestatumque se memin-  
nerat alterius utero, alterius brachiis.*  
Dices, hunc locum in illo habere suam  
exceptionem: videlicet, ut pietas tunc  
omitti possit, negligi benevolentia &  
humanitas, cum stat filio familias  
convolare in Monasterium. Crude-  
litatem ea casu, misericordiam videri:  
incivile, honestum: contumaciam,  
fidem. Atqui ne existimes (ô fili) ut-  
cunque Hieronymus hæc speciosissi-  
me ad Heliodorum: si tamen ageret  
serio, allaturum ei consilium: ut quod  
denotant verba, re adimpleret in pa-  
rentes. Absit ut Hieronymus parrici-  
dii auctor, sua forque esset: ut quare  
Æneas Pius appellatur:

*Illum ego per flamas, & mille sequentia  
tela.*

*Eripui his humeris, medioque ex hoste re-  
cepi.*

Contraria & opposita Christianus  
homo eandem appellationem assequi  
vellet, ut quocunque casu mallet  
Hieronymus Tulliam, quam Æneam.

imitari ab Heliodoro , licet propterea  
ut eo nomine Regna omnia invade-  
ret , quæ vel hîc sunt revera vel quæ  
esse apud mortuos Pagani imaginan-  
tur , ut qui sic evaserit in Monachum ,  
hunc præferat Cleobidi & Bitoni : iis  
præferat quos Catanæi Pios appella-  
runt. Tantum certe abest ut verba  
illa Hieronymi , in tantam crudelita-  
tem , tantumque nefas trahi ac con-  
verti possint : ut cum Hieronymus  
hæc Heliodoro diceret , nullus ei ex pa-  
rentibus superstes esset. Habebat so-  
lummodo sororem , & ex ea Nepotia-  
num , tunc infantem. Itaque non po-  
terat esse , ut si parentes deserta Syriæ  
illi interdicerent ? per calcatos , pro-  
jectosque nihilominus ambularet.  
Quid vult igitur Hieronymus ? Cum  
Heliodorus jamdiu militiæ vacasset ,  
aliisque publicis negotiis : major fa-  
ctus atque orbus (ut diximus) terrena  
habuit pro derelicto , unaque cum  
Hieronymo , qui junior erat , voverat  
vitam solitariam. Ac sane diverterant  
in

in Monasterium , fuerantque diu in eo ambo , cum subiit Heliodoro desiderium visendi unicam sororem , atque ex ea filium. Illic certe animum mutat : mancipat se Ecclesiæ , & assumit Clericatum pro Monachatu. Tunc est proculdubio , cum ista ad eum Hieronymus de laude vitæ solitariæ : cum adolescens , ac pene puer ( ut ait de se alio loco ) cum recens ab Academia , his flosculis apud eum utitur : cum eâ militiâ seculari alludit ad Olympicam : & eos motus , eos affectus interponit , qui sæpe cum amicitia conjuncti sunt. Ea sane sunt hujusmodi , ut cum pro Christo Jesu castratio imperatur : cum excœcatio , si sint oculi in scandalum : cum derelictio & amissio bonorum , quasi sit impossibile locupleti intrare in Paradysum ( qua de re Augustinus epistola 89. ad Hilarium ) cum , non curare de crastino : cum jubetur , cui percussa est dextera , porrigere sinistram : aliaque id genus , quæ sine dubio inducerent hæreses , si  
ad

ad literam, non ad spiritum traherentur. Nonne de divitiis secularibus sic ille scribit ad Bonifacium: Animum virilem & Christianum, nec debent, si accedunt, extollere: nec debent frangere, si recedunt? Et Leontius, Episcopus Laodicensis, quod re sese secuiſſet, damnatus est in Ecclesia? Hinc & Anastasius, Episcopus Nicenus, quæſtio. 73. & 79. Quid est, *Si oculus dexter, vel manus tua te scandaliset: excinde eam abs te?* Non de membris corporis (inquit) hoc dixit Christus. absit, sed de amicis & cognatis. Dei enim opus calumniatur qui se abscindit. Et ille ipse Hieronymus, nonne scripsit tam multa, & tam vehementer in commendationem pudicitiae & cœlibatus, ut prope videretur damnare & improbare matrimonium? Et tamen certum est hoc proculdubio noluisse. Si ita esset, nempe ut ex animi sententia persuaderet Heliodoro citius per patrem proficisci, quam privari eo  
summo

summo bono, quod (ut videre est) collocas in Monachatu: quare huic Clericatum anteferet? Agnoscit quas solutiones afferebat Heliodorus, in alio valere posse: in sua causa non valere, qui, quia conceptis verbis professus sit vitam exercitatricem, nequeat sine fraude revocare gradum, & tendere etiam ad majora, ut puta ad Presbyteratum. Describit is quidem certe quam bene, ac beate vivatur in Monasterio: contra, in Sæculo quam periculose ac procliviter ad tentationem. *Gaudebat (inquit) de ascensu: sed timebat de lapsu.* Itaque non accusat discessionem Heliodori: imo, nec promotionem in Clerum. Neque amplius ei auctor est præcise, ut à vita hac communi transeat ad Monasticam. Sed quia ad eam jam antea defecerat, & rursus (ut dicitur) fastidierat cucullum: & quam una arripuerat, abjuraverat vitam: conatur Hieronymus validis istis argumentis, aut potius schematibus, retrahere eum in Mona-

Monasterium. Et quod ad ea attinet : *Qui amat Patrem & matrem plus quam me* : vide ( quæso ) num Heliodorus respondebat Hieronymo , locum ea habere , *Si de Martyrio ageretur* : & an Hieronymus huic solutioni recte satisfaciat. Ut ut sit tamen , ne quis aliquando orationi illi suæ , non tam veræ , quam eleganti , tenacius insisteret : & verba attenderet , non mentem : ad extremum ille ipse , tum cum provecior esset , epistola ad eundem Nepotianum , jam annis , jam virtute virum , sententiam mutat : & quæ olim proposuisset Heliodoro , fecisse ait , *cum laudaret pro etate : & calentibus adhuc Rhetorum studiis ac doctrinis , quædam more scholastico depingeret*. Nam certe eo tempore manebat commigrandi in monasterium , remigrandique potestas. Et tunc frustra quærebatur , liceretne eam vitam sequi invitis parentibus , cum votorum nulla essent vincula : & si quem sui instituti poenitentia cepisset :



fet: nulla alia erat pœna quam nota inconstantia. Patet ex epistola Augustini ad Bonifacium comitem. Nihil aliud tunc erat Monachi professio, quam prisca, liberaeque vitæ, ac pure Christianæ meditatio. Hujus itaque prætextu, honestius licebat ab affinium & cognatorum vinculis sese excutere. Itaque ne quis Hieronymum sui instituti faciat authorem, ad quod illud nihil attinet. Conatus est quidem Hieronymus sodales aliquot pellicere ad eandem vitam capeffendam. Atqui nec ea quidem omnibus placuit: nedum Pammachio, qui ei fuit amicissimus. Hic enim vinculis conjugii maluit invehî. Unus Bonosus secutus est Hieronymum, atque is certe contempta matre, fratre & sororibus Monasticam secutus est: sed non contempto patre. Imo, quod attinet ad Hieronymum: post desertum, Romam rediit. De hoc uno hæsitat Augustinus, epistola 76. ad Aurelium, An qui sponte recesserant à Monasterio,

rio, recipi deberent in numerum Clericorum. Perpende nunc igitur apud te, si locus ille Hieronymi te excusat: te, qui minor es etiamnum viginti quinque annis: te, qui & patrem & matrem habes: te, qui nihil prævoveras Jesuitas: te, qui non agebatur de evitando Paganismo, neque de persecutione fugienda: te denique, non cui obeundæ essent vastæ solitudines, sed si quæ sunt omnium Gentium sedes, urbesve elegantiores & amœniores: cui solitudo, pro carcere: oppidum, pro Paradiso. Sane cuicumodi fuit oratio D. Hieronymi: quacunque eam scripserit ætate: si nomen tanti viri te movit nihilominus, cur non movit ex adverso Heliodori exemplum (nam & sic eum Hieronymus appellat) cur non etiam Læti (si quæ extat ad eum epistola, est Augustini) qui major, & despectam Rempubl. repetiit tamen tædio omissæ matris? Cur non Joannis illius Chrysostomi, de quo ante? Non fuere minus sancti  
pro-

propterea, non minus Christiani, non minus fideles. Nullum ad pietatem est obstaculum. Nulli nuptias prætexent, nulli filios, nulli militiam, nulli negotiationem, nulli artificium, nulli servitutem, nulli divitias, nulli inopiam, inquit Chrysostomus ille, in homilia de nuptiis. Potest & urbem habitans, monachorum sapientiam imitari: potest & uxorem habens, & conversans domi, orare, jejunare & compungi, ut is ipse ait alio loco. Sed ne objicias, utcumque illa celeberrima exempla solius esse primitivæ Ecclesiæ, in qua facta comparatione Paganismi, cum Christianismo: cum religione, pietatis, de isto contemptu agebatur: producam tempore Bernardi Abbatis: atque etiam postremo, ne sit quo tantillum hæsites, satisfaciam Justiniano Principi? cujus constitutione sunt qui existiment tribui liberis, ut sine consensu patrum sese applicent Ecclesiæ: quo cunctis accurate perspectis, tute ipse sententiam

tentiam feras : Quod commisisti adversus me , rectumne sit , an ingratum. Hic res est inter Catholicos , imo inter Monachos , quod augustius est omnino. Beato illi Abbati fuerat nepos , nomine Robertus , quem pater in juvenili ætate destinaverat Monasterio Cluniacensi. Sed eo mortuo ante oblationem , Robertus sociaverat sese Cisterciensibus : & Bernardus ipse eum illic adoptaverat. Paulo post monachi quidam Cluniacenses circumvenère adolescentem , & ex illo Monasterio transtulère in suum. Hinc controversia inter Regulares. Bernardus primum accusabat hoc quasi lenocinium : videlicet , quod ad eam rem & dolum , & blanditias , & machinationem attulissent. Nam qui seducerent nepotem , tentasse in primis per Novitium quendam : postea , per absolutionem Monachum : postremo , per unum ex Prioribus amplissimis. Vim deinde accusabat , quod violassent ostiarios : atque ex Monasterio ,  
tan-

tanquam ex carcere, Robertum ex-  
misissent, Superioribus infciis, infcio  
Abbate, avunculo inconsulto. Vide,  
obsecro, num in tua causa sit aliquid  
hujusmodi. Primo, quod vir quidam  
Confessorius: postea: suo ordine,  
Cubiculi Magister hoc insufurrave-  
rint tibi: Nullam vitam beatiorē  
esse Regulari. Tandem, Primarius,  
aut Provincialis Illustrissimus, inter  
Regulares eam vestrā antecellere  
omnino: nam & cognominari ab ipso  
Jesu. Sed en quod præcipue allegaba-  
tur à Bernardo, & quod proculdubio  
vocationem atque inspirationem  
hanc, quam adeo extollitis, necesse  
est damnari ac rejici, *Petitio* (inquit)  
*quam Regula præcipit, non est pro eo*  
*facta à parentibus.* quasi diceret: Licet  
pater dum viveret, concupiuerit ali-  
quando ut suus ille esset Cluniacensis:  
non tamen impleverat desiderium.  
Itaque quod communis Regula diser-  
te exigit, ut qui vult Monasterium  
ingredi, offeratur à parentibus, &  
coram

coram testibus offeratur (id enim etiam continet) deest in professione vestra Cluniacensi. At in Cisterciensi, ideo non fuit necessarium, quia filius tunc temporis provecior erat, & erat sui juris. Cur igitur (exclamat Abbas) spoliastis me nepote? cur ~~non~~ gaudio? cur fructu Spiritus? cur animæ dimidio meæ? Non poterat Salvari mecum? Te, ô nepos (inquit) fefellit sanctitas: seduxit religio: perdidit auctoritas seniorum. Enimvero, si bonus ille Abbas tam acetbe invehitur in Cluniacenses, ut lupos rapaces eos propterea appellet: quid mihi liceat adversus Jesuitas, qui viventi patri filium indigne auferunt, negant fraudulenter? *Fortè miserti sunt tui*, ut Roberti Cluniacenses: forte damnatio imminebat moranti tibi cum parentibus, cum patruis, avunculis, amitis, cum fratribus & fororibus Christianis & Catholicis. Atqui, si hoc solum, Monasterium commutasse, tam erat periculosum huic nepoti,

poti, ut ea re posset animulam perdere (ita enim Bernardus ille) quid calcanti ac projicienti tibi non solum præcepta Dominica, sed & decreta Patrum: præcipue vero tam tumide & arroganter? Sed quam ob causam? non ut fidem mutes, sed vestem? non ut Ecclesiam, sed classem? Vide quid ad nos usque Vigoreus ille scripserit in Sermone de Martino, Nulla in re invenies dissentientem à vetere illa & sanctissima disciplina. Sic scripsit: Fuit D. Martinus inter Cathecumenos, & illuminandos. Ac licet cum patre & matre, Ethnicis, moraretur: attamen omnia obibat quæ desiderabantur à Christiano. Neque enim lex Domini solvit obligationem filii adversus patrem, servi adversus dominum. Et sane quidem Martinus non didicit ab Ecclesia rebellionem in parentes, imo obedientiam in omnibus, modo ne Deus offendatur. Ergo eâ reverentiâ Martinus obtinuit à parentibus, ut cui

va-

vacationi aptior esset, inspicerent sedulo, huic cum voverent. Neque enim ad filium pertinet, sine voluntate patris aut nubere, aut vitæ aliquod fortirigenus. Hic non addit exceptionem, *Nisi velit se dedere Monasterio*. Sed ne Justinianum omittamus: Sit ita sane, ut in ea fuerit sententia, Non sufficere ad exhæredationem, crimenve ingrati, vovisse Monasticam sine consensu patris: sequiturne, si noxa non est par parricidio, aut incestui: noxam attamen non esse? aut si locus exhæredationi non sit: rem propterea carere animadversione? aut si crimine, carere etiam vitio? Non poterat filius uxorem ducere sine consensu patris: & tamen si fecisset, non erat locus exhæredationi, nisi duxisset infamem. Itaque non peccabat ducendo uxorem sine consensu patris. Non sequitur. Jam affirmo imprimis quicquid Justinianus dixerit, senserit: omnes retro Imperatores contrarium sensisse: hoc est, illo casu  
admi-



admisisse exhæredationem. Unde hoc? quia is ipse profitetur, se in ea re emendare Jus antiquum. Atqui hoc affirmo quoque omnes illos Imperatores, ac potissimum Christianos plus simul habere auctoritatis, quam solum Justinianum, qui potuit perinde errare in traditione ista; ut erravit in divorcio, & ut ab Euthicete non discensit. Verum enim vero certum est (& patet ex fine Constitutionis, ubi agitur de servis aspirantibus ad Christianismum) cum Justinianus sustulit exhæredationem quam diximus, cogitasse de liberis Gentilium, qui se sociando Clero, aut Monasterio, acquirebant emancipationem: ut servi, eo ipso, libertatem. Nam alias si scripsisset de omnibus omnium liberis, aut de liberis Christianorum duntaxat: nonne verisimile est eum distincturum, quæ ætate essent qui invitis parentibus se Ecclesiæ, aut Monasterio mancipassent? videlicet ut si ante pubertatem, plenioresve annos: nulla esset

G

pro-

professio, si postea valeret, sine metu  
 abdicationis? Quod igitur Justinianus  
 ille constituit (Titulo nempe de Epis-  
 copis & Clericis) ita est, ut cum fides  
 Christiana favorabilior esset Paganis-  
 mo, propterea filii Paganorum,  
 sive essent in potestate patrum, sive  
 non, non minus hi absque exhæreda-  
 tione (qualis est illa quæ extat apud  
 Theodoretum, cap. illo 22.) fierent  
 Ecclesiastici suo voto: quam servi  
 infidelium liberi, cum nullo onere  
 pretii restituendi ab Ecclesia, ut ante  
 Justinianum cavebatur. (& certe  
 etiam cavetur à Gregorio I. lib. 2.  
 epistolâ 78. Si puella Christiana velit  
 invito domino converti in monaste-  
 rio) unde sic concludit: *hac omnia pie-  
 tatis intuitu nostra sanxit aternitas.*  
 Quod si objicitur, tandem Justinia-  
 num, Novellâ 123. §. antepenult.  
 Christianis jus idem dixisse: verisimi-  
 le est visum eo tempore, fuisse durum  
 quemquam exhæredari ob Monacha-  
 tum, propterea quod qui huic vitæ se  
 man-

mancipasset, non propterea erat Ecclesiastici ordinis vocabatur ad successionem: bona non amittebat, ut patet ex 239. epistolâ Augustini ad Alipium: & erat voluntatis (ut diximus) manere, aut discedere à monasterio. Sed postquam huic generi vitæ accessit votum paupertatis & castitatis: frustra parentes liberos exhæredassent, qui sese exhæredabant Monasterio. Nihil quicquam postea quærebatur, quam utrum, Professio valeret sine consensu patris. Displicent tibi hæc omnia & hæres in Justiniano potissimum? Oppono ei Concilium Constantinopolitanum sextum: oppono decretum illud maximum, quo utroque renovata est excommunicatio Gangrensis. Verum, uno verbo, oppono tibi extraneo Imperatori, cujus Constitutionibus non tenemur, optimos Principes nostros. Oppono statuta Gallicanæ Ecclesiæ: omnium consensum: postremo, res in Senatu judicatas. Carolus Magnus multa

constituit de Ecclesia, idque ( ut refert Ansegifus ) adhibitis Episcopis, Proceribusque omnibus. In his hæc non continentur, lib. 5. c. 95. *De pueris vero sine voluntate parentum, ut consuerentur, vel puella velentur, modis omnibus inhibiti non est: Et qui hoc facere tentaverint, mulctam qua in capitulis legis mundana à nobis constitutis continetur, persolvere cogantur.* Mulcta illa est in lege Salica, tit. de iis qui pueros vel puellas occiderint, vel toto derint. Ubi ante omnia annotandum est, æque accipi, Si quis occiderit liberos nostros, aut, si parentibus invitis copulaverit Monasterio. Nonne est enim interficere, sic agere in eos, ut jam parentibus pro extraneis habeantur? non sint consanguinei? non hæredes? sit extincta propagatio? sit adempta consuetudo? sit tanquam morte interdicta ipsa præsentia? Mihi antea videbatur, sic avelli à suis, contineri solummodo Fabia lege. At magnus hic Imperator hoc attribuit etiam Corneliæ. Er-

go quæ repræhensio, quæ accusatio est, tam sanctos, tam beatos, non solum Christo esse hypocritas: Ecclesiæ, anathema: plagiarios, legibus: Bernardo, lupos: verū etiā Imperatori, homicidas? Cavete, ne hæc crimina vos eo adducant aliquando, ut propter simile quoddam parricidium ejiciamini hinc turpiter. Videamus quod superest: num aliquid sit hodie tale, quale illud Caroli Magni. Carolus 9. in Conventu Aurelianensi, articulo 19. sic constituit: *Ne parentes, tutores, consanguineique ulli, ullave liberis, pupillisque permittunt Monasticam profiteri, nisi si masculi annum attigerint 25. fœminæ, vicesimum. Si ante illa tempora ulla professio fiat: ita allec̃ti, quicquid aliud olim legibus, moribusve obtineret, habeant testamenti factionem: modo ne quid in Monasterium conferant.* Hæc constitutio aliquid plus continet, quam Concilium Moguntinense, de quo Distinct. 16. & 20. Quæst. 7. & 3. cap. constituit. Nam quicumque ante

illam ætatem comam posuisset, censet dolo posuisse, atque in avaritiam Monachorum. Præterea, tantum abest ut permittat liberis ante illam ætatem se sine consensu patrum addicere Monasterio: ut parentibus, tutoribus, agnatis prohibeat hoc consentire. Quod si res judicatæ habent auctoritatem apud te: en judicium Senatus, ex Laicis & Ecclesiasticis conscripti, quod in tua causa actum est nominatim. Id ut nescires fortasse operam dederunt. *Quod Petrus Ærodius, Quaestor Andegavensis, questus est de Renato adolescente, filio suo, quem Jesuita sollicitassent, subrepsissent. Rectore ac Primario Collegii Claromontani propterea introductis: ad rogationem Faji, Advocati Regii D.E.R.I.C. Placere Ærodio dari inquisitionem plagii (nam si crimen non negassent, jussus esses exhiberi: tandiuque tuos esse in vinculis) Interea Senatum prohibere ne quid in præjudicium fiat neve illum adolescentem Jesuita societati ad-*

*admisceant sua, futurum alioqui fraudi. Id ne nesciant Collega, jubere per Claremontanos dici, rescribi suis. In Curia, 20. May, anno. 1586. Fortasse etiam leges aliquando quid de re ista Blesis Gallici Ordines postulare: & post fratrem quid ibi statuet Henricus III. Rex noster: Interim jussit renunciari de te Summo Pontifici, ut, quod bonis omnibus displiceret, id pro sua quoque potestate vellet corrigi & emendari. His omnibus vel rationibus; vel legibus, vel exemplis quid respondes? Si ob factum dolui tuum; aut si, ob eorum magis, quos certe auctores habes, quam tuum facione expers cujuscunque disciplinæ? an transversum me agit, ea perturbatio, qua Naturæ, qua carni, quæ sanguini plus tribuitur, quam par sit? Utrum vero ignorem quid sit in Religione pium, quid purum, quid præcipuum? Sentis (ut opinor) quod esse Ecclesiasticum, sive indifferens est, sive honestum per se: non debuisti in*

ea re me despicere. Si indifferens, quia tunc obedientia necessaria est: si honestum, quia honestius est, annuente patre. Sane si nulli hodie reperirentur qui liberos Ecclesiæ offerrent: essetque nihilominus necessarium juniores ministrare in Ecclesia: tribuamus Religioni, ut qua vi, quove dolo captus, deceptusque es, sic possint filii familias aliquando rapi, abduci que à parentibus. Sed tot Ecclesiis, Monasteriisve an deficiunt qui quotidie offerantur? At si, quicquid adferatur in contrarium, valet nihilominus votum parentibus invitis: saltem aliquid sit in eo quod pendeat ex eorum voluntate & arbitrio. Optent hoc aut illud Monasterium. Sit in hac obedientia Ecclesiastica, in quo pietatis illius antiquæ reverentiæve quam & Deus Opt. Max. & natura præscripserunt reliquiæ appareant tamen. Atqui tantum abest, ut liberi jure ullo possint relinquere parentes, quò adhærent Monasterio: ut qui impensius



sius scripsere de laude vitæ solitariae qualiter profecto Monachi) fateantur, hanc posse à liberis dimitti ac renuntiari voto, quo parentibus inserviant. Hoc etenim votum altero omni majus, antiquiusque esse, patet ex Gregorio illo Nazianzeno, qui revocatus à patre, quod litibus non sufficeret quæ ei mortuo Cæsario, altero filio, obvenerant ex administratione publicorum: deseruit monasticam, & ad parentes continuo convolvit, ad Gregorium & ad Nonnam, amissa Gorgonia. Patet ex illo Heliodoro, qui & Eremum, & Hieronymum reliquit, ut subveniret, non patri, sed (quod minus est) sorori, nepotique quem diximus. Idem sensit Augustinus (seu quisquis auctor est) ad Fratres in Eremo: nec vult ullum cogi posse ut redeat ad monasterium, nisi patre suo defuncto. D. ille Hieronymus in epistola ad Fabiolam, loquitur de discessione ista, cum ait: *Quanti monachorum, dum patris, matrisque*

*miserentur, suas animas perdiderunt?* quibus verbis non improbat discessum, si fieret vere ob paternum obsequium: sed ait, plures monachos, dum prætexunt tales excusationes, vitam & animam perdere. Quamobrem, ut maxime fuisses Jesuita me volente & consentiente: posses hoc tempore sejungi & distrahi à nobis? posses quavis in cellula, quovis in carcere (nam Bachíarius sic monasterium appellat) religiose, in quo bella, aut potius latrocinia, sine periculo audires, quæ Patriam hodie labefactant? posses non continuo advolare, ut omni ope, assiduitate, obsequio minueres illam molestiam quæ ex patriæ incendio, bonis præcipue, est maxima? Sed vi te detinent fortasse. Esto hoc magis, quam ut te omnem humanitatem, omnem affectum, ingenuitatem omnem, & præsertim hoc tempore quo non agitur de Religione, sed de Monarchia, existimem amisisse. Verum omissa præ-

prærogativa Antiquitatis, si lubet, Cer-  
temus quoque argumentis. Cum ita  
sit ut matrimonium pro Sacramento  
habeatur: & antiquiori quidem, si  
ordinem inspicimus; cur apud vos  
indigne sic tractatur? Nonne necesse  
est id, summo cum detrimento Reip.  
& Ecclesiæ, pollui, ac prætermitti,  
dum fructu spoliatur suo? dum pig-  
noribus? dum dissolvitur eo nodo,  
quo, qui igne & aqua astringitur, qui  
mensa, qui thalamo, qui sponsonibus:  
non strictior ullus, arctiorq; est? Quis  
curet liberos alere & erudire, si post-  
quam omni impensa ac sollicitudine  
hoc factum est: alieni sunt, non sui?  
Si quasi directo quodam jure, aut  
(quod magis est) Tyrannide Sarrace-  
nâ, avelluntur a parentibus? Si si-  
mul ac conjuges nostræ pepererunt,  
sint liberi statim primi Monachi oc-  
cupantis! *Qui patri eripit filium: e-  
ducatori, àlumnus: domino, servum:  
Deo efficit impium, patri irreligiosum,  
educatori ingratum, domino nequam,*  
in-

inquit Tertullianus adversus Marcionem. Præterea, tollere obedientiam liberorum, atque reverentiam perdere: Naturâ ipsam effodere est: est à fundamentis, a principio discutere omnem inter homines societatem. Obedientia (inquit Cyprianus lib. de abusibus sæculi) omnium disciplinarum mater est. Porro, tollit disciplinam, qui tollit paternam obedientiam. Et quoniam honoris ac conditionis æqualitas, pugnas ac dissidia plerumq; inducit: propterea Deus multos fecit Principatus, multasque subjectiones: ut pote viri & uxoris: filii & patris: senis & adolescentis, servi & liberi: Principis & subditi: præceptoris ac discipuli, inquit Chrysostomus, in epistolam ad Romanos. Qui tollit hos Principatus, tollit societatem. Necesse est denique is in impietatem, aut hæresim prolabor qui parentibus inobediens est, ut a fidelibus & infidelibus unanimiter scriptum est: videlicet a Plutarcho, lib. de fraterna amicitia & a Jesuita

fuita quodam , de Britannica hæresi. Sed eos ipsos melius est audire. *Nul-  
lus est* (inquit ille) *qui etsi, aliter tacitus  
sentiat, non enunciet, prædicet tamen,  
primum locum reverentia, Diis: secun-  
dum, parentibus eo usque esse a Natura  
tributum, ut Diis ipsis nihil tam gratum  
acceptumque sit quam si liberi officiose  
ac sponte dissolvant parentibus benefi-  
ciorum usuras, qui nequeant sortem.  
Nulla res tam argui contra ædios ne sint  
quam si despiciant parentes, commit-  
tantve quid adversus eos vel tantillum.  
Iesuita vero: Quid Anglos adolescen-  
tes tam cito hæresi imbuunt? desierant esse  
honorifici in parentes. Quasi diceret,  
Mirum non esse si tam facile defice-  
rent a paterna religione ac fide, cum  
semel contumaciam atque irreveren-  
tiam degustassent. Deus bone si ea  
admitti, laudarive potest: an debet,  
hodie præsertim, & hic apud nos; ubi  
jam nemo est qui non existimat esse  
eo officio quo sive DEO obnoxius est,  
sive Principi, sive Magistratibus, sive  
Ma-*

Majoribus universis? Atqui omnes istæ prærogativæ reperiuntur in parente: in filio, istæ obligationes omnes. Honestumne est igitur, ultrâ proterviam, favere etiam illiberali animo & ingrato? *In novissimis diebus* (inquit Paulus ad Timotheum) *instabunt tempora periculosa. Erunt homines semetipsos amantes, blasphemæ, parentibus inobedientes, ingrati, sine affectione.* Quod si denuo Religionem objicis: te si semel elegeris Monachatum, me deinceps magis veneraturum, & quod longe me amplius tenebis: dico obedientiam ex inobedientia nasci non posse. Præterea, qui color, Scholasticos Doctores, Scotum, Durandum, Aquinatem, Paludanum, Dominicum Sotonem, aliosque plures, tam sollicitè disputare, an liberi infidelium possint baptisari invitis parentibus (Thomas ille omnino pernegat: asseritque Ecclesiam id nunquam permisisse: non Sylvestrum, Constantino Magno: non Theodosio, Ambrosium)

sum) atque interea contra paterna  
vota, vota liberorum sic approbari,  
suscipi sine controversia? Sane si pa-  
rentes sint Christiani: pronunciant  
uno ore, vi adigi posse ut eidem Reli-  
gioni inicient suos: hosque amplius,  
ut eam sane Fidem profiteantur quæ  
est civium universorum. Sed si qua sit  
particularis Regula, aut societas se-  
juncta a communi: minime hoc qui-  
dem. Id enim esse voluntatis ut puta:  
sufficere, si Christum profiteamur: Do-  
minicum, aut Augustinum: non neces-  
se. Sed qui Judæus, Paganusve esset: B.  
Thomas non solummodo negat de-  
bere attrahi ad Fidem, violentia, aut  
si minor sit ætate, ut ad eam rem pro  
liberis consentiant parentes: verum  
& Concilium Toletanum 4. cujus  
mentio est dist. 45. Cap. de Judæis.  
& Gregorius Magnus, epistola 45.  
ad Virgilium & Theodorum. Episco-  
pus (Galliarum) Si placet, liceat blan-  
de appellare, velitne quis magis in  
claustro esse, quam in Repub. Sed  
vis,

vis, an adulatio est, postquam quoquo modo hæc extracta vox est, *Volo monachari*: te deinceps quasi in ergastulo habere, aut te huc & illuc circumducere, agere, ne incidas in parentem, propinquumve ullum, qui (licet Christianus) te à cogitatione illa dimoveat quæ obrepfit ante annos: aut, si jam ineunte adolescentia tunc obrepfit tamen, cum in est maxima imbecillitas consilii, ut inquit Cicero? An alter es Hercules Prodicti, cui cum pubertate prudentia obtigit? Utrum liberi nostri ad Clerum, aut ad Monasterium non aliàs converti possunt, quam si continuo, quasi igne & aquâ interdicti sint, hoc est, patris, matrisque communione & aspectu? Ecclesia hoc non laudavit nisi in liberis Iudæorum, ne facti Christiani ultra involuerentur erroribus parentum: Ita est in Canone. Sed de Christianis diffidere inter Christianos: quod novum esset Evangelium? Quæ convenientia, ut, juxta traditiones

nes



nes Ecclesiæ, Presbyteri nequeant benedicere nubentes, nisi oblatos a parentibus: nequeat Episcopatus ordinare extraneum, nisi Diæcesano permittente: nequeat suscipi peregrinus, sine formatis (ut appellant) sine litteris Dimissoriis, aut Commendatiis: possint vero admitti vota filiorum, filiarumve sine traditione, commendatione, arbitrioque domestico? Sed ut tandem nostra concludatur oratio: sic contra ea omnia quæ dicta sunt, patriam potestatem flocci facito ut velis, sive ut potius tibi præcipiunt ii apud quos tam beate & Deifice habitas: nihilominus apud liberos bene natos, & vere legitimos, adhuc eam sustinent sustentant quatuor columnæ. Prima est indignatio Dei viventis., qui injuriâ patris reputat suam, *Quam mala fame est (inquit Ecclesiastes) qui derelinquit patrem & a Deo maledictus, qui matrem exasperat.* Secunda: Relegatio filii, cui pater ob inobedientiam sic pronunciat: *Discede à me, atque ab aspectu abstine meo.* Nam et si (ut apparet) nihil habes antiquius: certissimum est tamen, nullum Dei supplicium majus esse adversus homines patris in liberos: in subditos Principis, quam cum ab iis aspici nolunt, quibus nihil ore, aspectuque suo debuerat esse jucundius. De Deo: nonne ita est, ipsam æternam damnationem in privatione illa consistere: ut contra Dei visio, est tota merces? De hominibus: Davidem eo genere animadvertisse in Absalonem? hinc ille post biennium: *Si pater (inquit) memor est adhuc iniquitatis*

*tatis meæ, ô Ioab, mortem magis impetrator.*  
 Quid? nonne Manlii Torquati sententia huiusmodi fuit adversum Junium Syllanum, quem Macedones accusabant de repetundis: *Quia non Talis fuisti in imperio, quales maiores tui extiterunt: te in conspectum meum venire veto:* Non potuit ferre hoc iudicium, manus attulit sibi. Est etiam de Marco Scauro, qui filio e pugna turpiter redeunti, misit qui diceret, *Reus fugæ coram ne accedito.* Hoc nuntio, filium gladio in se, quam in hostes, fortius usum. Sed & Augustus cum Tarrio adversus filium domi assideret, ob id ipsum pronunciavit, *Acerbissime puniri qui à paternis oculis submovetur.* Huius pœnæ elegantissima est ratio apud Platonem: Nam si (inquit) liberis nullum pulchrius simulacrum est Deorum: nullus domi pretiosior thesaurus quam decrepiti parentes: quæ durior pœna iis imponi possit, quam privari aspectu tam familiarium Deorum, ne eos liceat tangere, liceat osculari? Si exilium propterea intolerabile est, quia hoc præstat ut careamus aspectu ædium quarundam, locorum, lapidumve, quos monumenta appellamus: quid, carere iis hominibus qui nobis ea ipsa construxerunt? imo qui nos ipsos? & qui nihil sibi voluere suppetere, quam ut liberis relinqueretur? Quod ad Principem attinet: in promptu est exemplum ejusdem Augusti, qui ut mulcicaret Athenienses, maluit divertere in Æginum insulam, quam videri Athenis. Exemplum Marci Antonini Philosophi, qui obeundo

An-

Antiochiam, accitus noluit ingredi, quod Avidio consensissent. In promptu, Caroli VIII. Principis nostri, qui reportato exercitu ab expeditione Neapolitana, & ad D. Dionysium gratias agens, voluit videri Lutetiae, quod proficiscenti non suppeditaverant nimium. Tertia animadversio quam parentes perpetuo habuerunt, & quam perpetuo sunt habituri: (inquit Ambrosius, lib. singulari, de benedictionibus Patriarcharum) Benedictio est, quâ afficiunt gratos & obediētes: Maledictio, quâ ingratos & contumaces. Benedictio, merces obediētiæ est, inquit Elias Cretensis. Ideoque Gregorius ille qui jam patri audiens esset, non postulat sibi dari benedictionem, sed reddi. Esto: tanti eam ne estimes, quam Jacob, aut Josephus, aut Nazianzenus ille: attamen per timesce maledictionem. Memento filiorum Noë: Recole quod est in Deuteronomio, secundo loco imprecationum: *Maledictus qui non honorat patrem suum, & matrem suam. Et dicet omnis populus, Amen.* Quod cap. 111. Ecclesiastici: *Benedictio patris firmat domos filiorum: maledictio autem matris, eradicat fundamenta.* Quæ omnia sunt apud Monachum ipsum Antiochum, homiliâ 108. Vide quod est apud Homerum, odyssæâ 2. ubi Telemachus reformidat matrem ejicere è domo Ulyssis, ne in ejus maledictionem incidat. Quod apud Platonem, lib. 11. de legib. Imprecationes Oedipi, Amyntoris, Theseique aduersus liberos, à Dijs susceptas auditasque esse. Nihil (inquit)

quit) *Filio tam exitiosum, quam paternæ diræ.* Quod denique apud Suidam, de Leontio, Tripolitano Episcopo, cuius precibus annuit Deus: Filius obiret magis, quam ut oculis cerneret eam vitam vivere impiam atque inhonestam. Postremum remedium parentum: auxilium est iudicis, qui ad solam eorum postulationem, aut poenâ, aut carcere in liberos utitur, quique eam sententiam dicit in contumacem, quam expostulant parentes (ita enim ab Alexandro rescriptum est) in petulantem (utcunque leue crimen esset in extraneo) dura & aspera omnia. Cur ita? ut liberis nihil sanctius, nihil inviolabilius sit parente. Est in nostris annalibus, tempore Ludouici, Stephanum Bolceum, Præfectum Parisiensem, suffixisse quendam, quod mater aduersus eum dixisset, *Nullâ cura posse efficere ne perpetuo fur sit.* Denique id nobis dici potest quod est apud Hieronymum, lib. de honorandis parentibus: *Servite Patribus futuri patres & matres vestras, tenerâ* (inquit) *diligite pietate, ut & vestrae conjuges mereantur matrum nomine appellari.* Superest igitur, si vis evitare has poenas, quæ omni jure filio imminet contumaci: sique hæc disputatio eam vim habet ut tu ad teipsum redeas: si aliquod bonum institutum est tibi: sitque propterea in animo meditatio officii: hoc agas in continenti, fac parabola Christi vera sit in nobis, *Epulari & gaudere oporteat, quia filius meus mortuus fuerat, & revixit: perierat, & inventus est.* Quod Ecclesia ambabus manibus poenitenti perpetuo est obvia,  
pa-

parentum imitatione facit. Antequam clames, ego exaudiam. *Veni itaque & pax erit: revertere, & satisfactum est:* (Nam placet te ita alloqui, ut nepotem Bernardus ille) *Contra iuris ordinem revoco lesus, qui me lesit: spretus, requiro contemptorem: injuriam passus, injurioso satisfacio: rogo eum denique à quo debueram rogari. Ut Cæsarius, Homiliâ 30. Orat judex, et desiderat parcere.* Sin tibi iterum obtunditur, quod ubi attigeris 25. annum, tum tibi omnia erunt in potestate: neque habebis amplius quo ex contumacia metuas fraudem: propterea quod te illa ætas quasi emancipaverit, reddideritque tanquam patremfamilias: *Dico, edico tibi:* Licet pietas non finiatur pubertate, neque majoribus annis: imo crescat eo tanto: unde & Plato severius in eum animadvertit, qui 30 annorum, quam qui minor, patri inobediens est: (edico inquam) quod si mansisses apud me usque ad legitimam ætatem: possem eo tempore tibi aliquid indulgisse, vitam eam eligenti in qua habilitatem nactus esses, Sed quemadmodum virgo quæ rapta est immatura, quamdiu apud raptorem est, ætatem non attingit: matrimonium nunquam confirmatur, ut decretum est in ipsa Tridentina Synodo: sic, quos annos fueris ibi affecutus, ubi me invito te custodiunt: ne ita eos tibi prodesse putes, quin quicquid postea usurpaveris perpetuo irritum, prophanum, illegitimumque sit. Cur ita? quia Jesuitæ te semel seduxerunt, & es semper apud eos mala fide, malo more: & cum jactura atque detrimen-

to alieno te contrectant. Non posse excipi, ibi quid fieri à Spiritu Sancto, ubi ita agendo contrahitur maleficium. Quemadmodum res furtiva quousque redierit in domini potestatem, perpetuo vitiosa est: sic qualiscumque succreueris, in æternum erit in te & plagium, & latrocinium, nisi te arbitrio subijciant meo. Estne qui tibi contrarium prædicet? dicilli ex Platone: Mente, & ingenio opus habes.

Τονέων γὰρ ἀμελεῖν, οὔτε ἀνθρώπου νοῦν ἔχων, ξύμβυλός ποτε γένοιτ' αὖ οὐ δεῖς ἐνδυνί.



FUGITIVUM  
PETRI ÆRODII

Quæsitore Andivi V. C. filium  
sic affatur

GILBERTUS BANCHERELLUS.

**Q**uerit quæsitore gnatum, indulget-  
que dolori:

*Ærodius prolis maxima cura  
sua:*

*Imas assiduo corroditur ille medullas,  
Tundit & in viduâ pectora mesta  
domo.*

*Quis pater ad diros fugitivum gaudet  
Iberos*

*Natum, olim in valido fulcra fu-  
tura seni?*

*Impie, vah! patrium puer indigne  
dolorem:*

*Dure*

*Dure puer flocci iura paterna facis?*

*Iura quidem Hyblaeo fartim condita lepore,*

*Quae colat hyrcanum vel fera pasta nemus.*

*Tu tamen obtusa crudelis respuis aures,*

*Nec vis divinâ (perdite) lege regi.*

*Indigne Aërodii præclari nominis haeres,*

*A patriis laribus quid male gnate fugis?*

*Ni redeas adestandem mansuete paternas,*

*Desine tam docti, filius esse patris.*

**F I N I S.**

ANT 1317506